

ASO LUA, 15 APERILA 2014

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga faaaloalo ou te faafeiloai atu ai i le paia maualuga o le Maota i lenei foi taeao fou. E talitonu le faamoemoe o lea ua tatou taunuu mai i le amataina o a tatou galuega i lenei vaega o le aso, ae faafetai i le alofa o le Atua i le taitaiina mai o outou soifua manuia aemaise foi o outou soifua laulelei le paia ma le mamalu i sui usufono uma o le Maota, aemaise o lau Afioga i le Taitai o le Malo ma lau Kapeneta mamalu, aemaise foi lea tala-na-atoa i le afio mai o le Afioga i le Taitai o le Itu Agai ma sui usufono mamalu uma o le Palemene.

E manatu foi o lea tatou te faatasi ma le mamalu o Samoa i tupu ma ee, tamalii ma failauga, faletua ma tausii, saoa ma tamaitai i Faauluuluga o Matagaluega aemaise o matafaioi a le paia ma le mamalu ua faatasi mai ona o le faatinoga o tiute mo le Palemene.

E ofo alofa atu ma faatalofa atu i lenei aso, malo le soifua manuia malo foi le onosai mai. E manatu o le aso ananafi sa tatou talanoa ai i nisi o tulaga taua mo le faasologa o a tatou galuega e pei ona faatulagaina, ae na ona momoli atu o le agaga faafetai ona o le onosai. Ua tele foi upu i manū i la tatou Fonotaga i mea uma ma e talitonu o le ala lea o le tatou tapa tulia i le tatā i le Atua ma Lona finagalo ina ia aua ne i tuulafoaiina i tatou i lenei aso i a tatou galuega. Ia mamao ni lagilagia ma ia aveese atu i le faitotoa lea o le Maota le tiapolo, o ana fili ma ana au ina ia aua ne i i ai se peau e laga po o se agaga faasalavei e agai ina faaletonu ai outou finagalo a o tatou agai e soalaupule le manuia o le atunuu.

E faapena foi ona ofo alofa atu Samoa i lau tapuaiga i lenei aso i lau tapuai faafofoga mai, malo le tapuai, faamalo le tauatai, malo le galulue. O le tagata ma lana ma matafaioi aua le atiaaina o nuu ma afioaga, aiga aemaise o le paia maualuga i Ekalesia i la outou tatalo le leoa e manuia ai faiva o Samoa aemaise o taumafaiga a lau Palemene.

O le a tatou alo i a tatou galuega e pei ona faatulagaina i lenei aso, ae i ai le talitonuga o le a tatou apefoe faatasi e vave ai foi ona faatinoina feau, tiute ma galuega e pei ona faatulagaina i le tatou Pepa o Galuega.

MALELEGA MAI LE AO O LE MALO

Na fofogaina e le Fofoga Fetalai Malelega mai Lana Afioga Mamalu O Le Ao o le Malo.

1. “TUSI FAAMAONIA O LE TULAGA FAANATINATI.

E tusa ai ma aiaiga o le Tulafono Tumau 99(2) **O AU, TUI ATUA TUPUA TAMASESE EFI, O LE AO O LE MALO**, ua ou tuuina atu nei le Tusi Faamaonia o le Tulafono Faanatinati o le Tulafono Tau Faaofi ua faaali atu iinei mo le tagofia e le Fono Aoaofaitulafono i lana Fonotaga o lo o faagasolo nei.

1. Tulafono Tau Faaofi o Teuteuga o le Tulafono o Faiga Palota 2014.

TUUINA ATU i lou nei Lima i lenei aso 14 o Aperila i le tausaga 2014.

(Sainia): Tui Atua Tupua Tamasese Efi
O LE AO O LE MALO

2. TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoaofaitulafono na te iloiloaina ai le Tulafono Tau Faaofi ua faaalii iinei:

1. Tulafono Tau Faaofi o Teuteuga o le Tulafono o Faiga Palota 2014.

TUUINA ATU i lou nei Lima i lenei aso 14 o Aperila i le tausaga 2014.

(Sainia): Tui Atua Tupua Tamasese Efi
O LE AO O LE MALO.”

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai o se mea e fia faamalamalama.

FOFOGA FETALAI: Sei tulai mai lau Afioga i le Taitai o le Itu Agai.

Afioga Hon Palusalue Faapo II: Faafetai lava i le avanoa i lenei taeao fou e pei ona e siitia le viiga ma le faafetai i lo tatou Matai Sili ona ua tatou feiloai i lenei taeao, ae ua ou tulai atu ma le faaaloalo ona o le mataupu lenei sa ou fesiligia muamua foi. O lea la ua aumai le Teuteuga o le Tulafono o Faiga Palota Faanatinati. O le fesili pe aisea? O lea e faatoa fai le faiga palota i le 2016, ae silasila i le faasologa o a tatou galuega i Tulafono Tau Faaofi faapenei, e tataua ona ave i se Komiti a le Palemene ina ia maua avanoa o itumalo e faaali ai ni o latou manatu i le Tulafono Tau Faaofi lenei, leaga o le vaevaega o itumalo o le mea tonu lea e fitoitonu i itumalo. A o le a le mea lea ua tulai mai? O le faatemokarasi le mea lea ua fai nei?

FOFOGA FETALAI: O lea ua ou maua Palusalue lou finagalo - o lea ua ou maua.

Afioga Hon Palusalue Faapo II: Se faatemokarasi le faanatinati faapenei o le mea lenei?

FOFOGA FETALAI: Palusalue, o le a avatu le tali a le Fofoga Fetalai i le tulaga lea.

O le mataupu i le tuuina mai o Tulafono i totonu o le Maota Fono, o le faitalia lena a le Malo e a ia Tulafono. O i latou foi e faataatia mai le tuuina mai o Tulafono i totonu o le Maota Fono lenei. O lea e alaala mai le Malo ma tulaga e faapine ai ma faatulaga ai Tulafono nei. A tuu mai lava e le Malo le Tulafono e alu i le tulaga masani, o le tulaga lena e i ai a tatou Fono aua o i latou e i ai le matafaioi e tuuina mai ai ona ua silafia ua talafeagai lelei pe ua atoa foi suesuega i le mataupu lenei. O lea e afio mai le Afioga i le Palemia ma lana Kapeneta, o le auala o lea e aumai ai e le Palemia ma le Kapeneta o le mea lena e mulimulitai ai le Nofoa.

Se i tulai mai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): O le Tulafono Tau Faaofi lea ua tuuina mai lau Afioga i le Fofoga Fetalai, e le gata ina suia ai faiga faavae ma tulaga o itumalo nei, ae oo foi i tupulaga fai mai. E le o se Tulafono Tau Faaofi faigofie le Tulafono Tau Faaofi lenei ona e ao ona lava le taimi e tapenapena ai finagalo o sui usufono aemaise o itumalo ma tagata palota ona e taua le Tulafono Tau Faaofi lenei. E le tataua i lou talitonuga ona talanoaina i se taimi vave ma se tulaga faanatinati. O lea e pei ona saunoa le Taitai o lenei Itu e le faapea ua lata mai le palota, a o le Tulafono Tau Faaofi e taua aua tatou te le faia mo i tatou, ae tatou te faia mo le lumanai o le Palemene, le atunuu ma Samoa ma ona tagata. E i ai foi sui faipule e faasagatonu i ai le mea lenei.

FOFOGA FETALAI: O lea ua ou maua Lealailepule lou finagalo.

Afioga Hon Palusalue Faapo II: Lau Afioga i le Fofoga Fetalai, na o sina mea lava lea e tasi ma lou faaaloalo.

FOFOGA FETALAI: Sei tulai mai le sui usufono mamalu Palusalue.

Afioga Hon Palusalue Faapo II: A ou tilotilo atu i le faiga o le Tulafono Tau Faaofi lenei, e faatogafiti. E fai lava ma pasia ai lava i le aso. O fea le aiatau a tagata, o fea aiatau a itumalo?

FOFOGA FETALAI: Malie Palusalue, malie alaala i lalo, sei fai atu leaga o lea o le a oo i le tulaga le talafeagai upu ia ua fai mai.

Afioga Hon Palusalue Faapo II: Ua ese le mea lea ua i ai le tatou Palemene.

FOFOGA FETALAI: Alaala i lalo. E faatogafiti le saina a Lana Afioga Mamalu O Le Ao o le Malo? Sei fai mai lau saunoaga? O le manatu ea o oe e seu silasila.....

Afioga Hon Palusalue Faapo II: Lau Afioga.....

FOFOGA FETALAI: Alaala i lalo.

Afioga Hon Palusalue Faapo II: Lau Afioga.....

FOFOGA FETALAI: Alaala i lalo. O ai e ana le tusi lea e aumai ai le faatonuga i le Fono Aoao? O le manatu o i ai Tuivalea i Lana Afioga Mamalu O Le Ao o le Malo e soona saina ai se mea na te le silafia? Fai fuafua faamatalaga; e le soona tuu atua e le Nofoa le mea lea i le taeao lenei, ae ona o tulaga masani.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai, ua ou tulai atu lava ma le agaga faaaloalo ona o le mataupu o lo o ua aumai i lumamea.

O lea e i ai le avanoa e fai ai le fefaaliaiga o taofi, a o le Tulafono Tau Faaofi foi lenei, o le tele o mea nei e tusa ua tolu Komisi Suesue. O Lipoti uma lava ua uma ona tauaoina e le Maota ma faitau i ai. Ona pau lava la tulaga i le tele o mea ia o lo o i ai, o mea ua tausaga ona aumai i totonu o Lipoti a Komisi Suesue ma tatou faitau ai. O ia foi Komisi Suesue ma Lipoti e tauaoina lava i totonu o le Maota lenei ma faitauina ai. E le fou foi mataupu aua afai o le tulaga i le toe faatulagaina o itumalo, ua leva ona aumai pea, aumai pea faasalalau. O lea foi sa tulai mai le Taitai o le Itu Agai ma faitioina le Malo i le tuai ona aumai o le Tulafono, a o le Tulafono lava ia ua leva ona taoto i totonu o le Maota nei. A o le a le mea ua oo atu ai le Ofisa e amata ona tapena a tatou pepa o faiga palota i suafa o i latou e tataua ona faamauiina, a o fea le Tulafono? O le tali atu lava i le finagalo o le Taitai o le Itu Agai lea ua aumai ai e le Minisita, Afioga Hon Fiamē le Tulafono Tau Faaofi ua uma ona tapena ona itu uma. Sa fai faasalalau ma faatalanoaga i luga o a tatou alaleo faasalalau mo le malamalamaaga o lo tatou atunuu.

Lau Afioga i le Fofoga Fetalai, e le fou nei mea o lo o aumai. E faatoa aumai nei, ae ua leva lava ona faatalanoaina ma tatou malamalama i ai ma faamalalama.

Lau Afioga i le Fofoga Fetalai, e pei o le itu lena ae e le o se agaga e faapea e faatogafiti ona fai, a o mea ua tausaga o faataoto i totonu o le Maota lenei Lipoti nei. Lau Afioga i le Fofoga Fetalai, o lea foi e tele lava avanoa ona o lea foi o le a tatou agai atu i le faitauga muamua ma le faitauga faalua e avanoa ai sui usufono e fesili ma sausaunoa, ae tali atu le Malo e auala i le Minisita e ana le Tulafono Tau Faaofi.

Lau Afioga i le Fofoga Fetalai, o le faamalalamaga lena. E faamalulu atu i le Itu Agai, e le o le agaga lea o lo tatou Malo o le faatogafiti po o le faatopelau, ae ua leva tele ona tapena le Tulafono Tau Faaofi lenei. E le fou foi ae ua leva ona ave i ai mafauauga ma faatalanoa i luga o nusipepa ma leitio.

FOFOGA FETALAI: Tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang ona tuu atu ai lea o le avanoa i lea Itu o le Maota.

Susuga Hon Papaliitele Niko Lee Hang (Palota Taitoatasi): Faafetai i lau Afioga i le Fofoga Fetalai mo le avanoa. Na o se mea e fia malamalama ai lou nei sui usufono ona o lea e matau atu o le Tulafono Tau Faaofi lea o le a faitau lava muamua, lua, tolu ma pasia ai nei, a o le fesili faamolemole, pe e le o aafia ai le Faavae po o le Constitution? O Nofoa ia o le Palota Taitoatasi, ou te talitonu o la e aiaia i le Constitution. A faapea la o le a pasia le Tulafono Tau Faaofi, e le solia ai la le Faavae po o le Constitution o le Malo? Faamolemole e fia malamalama i le tulaga lea.

FOFOGA FETALAI: Se i tulai mai se tasi o sui usufono mo Vaimauga Sisifo, Tofa Lefau Harry Schuster.

Tofa Lefau Harry Schuster (Vaimauga Sisifo): Faafetai lava i lau Afioga i le Fofoga Fetalai mo le avanoa.

Lau Afioga i le Fofoga Fetalai, ou te le tetee pe taumate ala o le Tulafono aua e mafai e le Malo ona faanatinati le pasia o se Tulafono ae faakomiti le fale atoa i le pasia o se mea e manaomia faatopetope. A o lau fesili lau Afioga i le Fofoga Fetalai, o le tasi lenei corner stone mo faigamalo saoloto, o le aia a le tagata na te filifilia ai i latou e taitaia i latou. I lau la vaai, e moni e i ai le aia faasui usufono e fai ai saunoaga i le Tulafono Tau Faaofi lea, ae ese lava le aia faasui usufono i itumalo faalauaitele ma le aia a le tagata e toatasi e fai ai lana filifiliga i le mea e fia palota i ai.

O le tulaga lena o lea ou te vaai atu i ai e lagona ai lou faanoanoa. O lea e uia ala o le Tulafono, a o lou manatu vaivai lava, pe talafeagai le faaaoaga o le Tulafono lea e fai ai le Tulafono Tau Faaofi lea, a o se Tulafono e patino i le saolotoga o Malo saoloto i le filifilia lea e tagata o i latou e taitaiina i latou? A o le faiga foi o lana filifiliga faatagata saoloto po o fea o itumalo ia o le a vaevaeina nei e alu i ai, ma ou te tautala lava au i le mea lea ou te sau ai nei i lo matou itumalo o Vaimauga Sisifo. E tai pei lava o isi itumalo ma nuu, e pito i Apia, pito i Matautu. O i latou la e le i faamauina o la e i ai le aiatatau po o fea o mea ia e me'i i ai. O e foi la sa faamauina muamua po o fea e me'i

i ai. O lea la ua aumai nei le Tulafono Tau Faaofi lea, a pasia nei o lea ua fai atu le Tulafono o iinei e te alu e te palota ai ae ua le faia e oe lau filifiliga. I lau lava vaai i ai, o se corner stone o le democracy, ia i ai i so o se vaega e alu i ai le filifiliga lea a le tagata e toatasi e fai ai lana filifiliga.

Ma le faaaloalo tele lava lau Afioga i le Fofoga Fetalai.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai.....

FOFOGA FETALAI: Malie lau Afioga i le sui usufono mo Falealupo, sei avatu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea e tau matau atu pei o le a tatou agai e talanoa le Tulafono e lei faia le faitauga muamua ma le lua e faatino ai fesili ia o lo o laga mai. Na o se tuualalo i lau Afioga, po o fea o i ai lou finagalo?

FOFOGA FETALAI: Ia o le ala lea lau Afioga i le sui usufono mo Falealupo, malilie le Maota o lea o le a avatu le Faaiuga a le Fofoga Fetalai ma faamalamalama ai lo outou finagalo.

Afioga Hon Palusalua Faapo II: Lau Afioga i le Fofoga Fetalai e tasi lava si mea lea. Leaga e alu alu le faitauga ua pasia le faanatinati, o le ala lea o lou tulai atu, pe ua lagalaga finagalo o le Maota.

FOFOGA FETALAI: Ia faafofoga mai la sei fai atu lau tala lea.

Afioga Hon Palusalua Faapo II: O le ala lea o lou tulai atu ina ia.....

FOFOGA FETALAI: Malie le Taitai o le Itu Agai, ou te talosagaina lau Afioga i le Taitai o le Itu Agai, ua tupu soo le mea lea i lo ta va o lou fai atu lava ae e tulai mai lava ma e saunoa mai lava i le mea o lena e te finagalo i ai. Ou te fautuaina ina ia e faitauina lelei Tulafono Tumau 89, o le a ou le tolaulauina le Tulafono Tumau lea mo le faafofoga a le atunuu. O lau toe faatonuga mulimuli lava lea i lau Afioga, 89, ia e alofa e silasila i ai ma tausi i ai le mamalu o le tatou Fono. Silasila foi i le taeao lenei ma le tulai mai o le Tulafono lenei, ua uma ona faataatia faiga ma alafua e limataitaiina ai Tulafono e tuuina mai i le Maota lenei. Ou te manatu foi ma ou lagona o Tulafono e tuuina mai, e pule lava le Malo i taimi e tuuina mai ma faasologa, a o le tatou Maota Fono e i ai le avanoa o lea o le a tatou agai nei e talanoa le mataupu lenei, pe alu i le tulaga masani pe faatulaga i le tulaga faanatinati, o lea e uiga auala o le Tulafono. Silasila foi lo outou mamalu ma lo outou paia, o ai oi sili e le o outou o sui usufono o itumalo na tatou omai nei e fai upu o le atunuu, o lea e tatala lo tatou avanoa e talanoa ai le mataupu, tatala lo outou avanoa e le faapea o le a faanatinati ona tuu atu lava lea e fai. O lea e aumai ia aiaiga o le Tulafono ma outou tulai mai foi e fai o outou finagalo. E le faapea foi faatoa fai i le taeao nei o outou finagalo i le Tulafono lenei, ua vaeseuga ma vae...e uma loa le Faiga Palota, fai le Komisi Suesue, uma le ituaiga palota fai vaega suesue. Afai o le tulaga lena i le vaevaega o itumalo,

saunoa i le taimi e soalaupule ai le mataupu, e toe faatali i itumalo ma mea uma. O le a le mea na outou faatalitali ai sei aumai le Tulafono ona outou saunoa lea? Ae o le a le mea na le tuu ai, sei fai le faaiuga ma faatulaga mai le Tulafono i le Maota?

O lea ou te manatu le tatou Maota, o lea ua tuu mai le Tulafono i le tulaga aloaia ma le Tulafono ua tuuina mai, ua maea ona saina Lana Afioga Mamalu O Le Ao o le Malo. Ou te le iloa la po o ai se isi saina i luga atu o le mea lea. Tatou sauni tatou te omai e soalaupule le mataupu. Tatala lo outou finagalo i felafolafoaiga, afai ua leva ona outou tapena, o le taimi la lenei e faaali ai lo outou finagalo i le Malo, faaali lea o mea uma e tusa ma le Tulafono lea ua faataatia. A o le saina saina mai o Lana Afioga Mamalu O Le Ao o le Malo ae toe faataatia, e le talafeagai i lou lea lagona. E faamalulu atu ai i le tatou Maota, ia o le a faagasolo Taulumaga o le tatou Fono i tulaga ua uma ona faataatia i le Pepa o Galuega.

Ia sei tulai mai le sui usufono mamalu mo Siumu.

Tofa Hon Tuuu Anasii Leota (Siumu): Lau Afioga i le Fofoga Fetalai e tulai atu e fia faaali se manatu ona e lagona le faanoanoa ona o le tulaga faanatinati lea ua aumai ai le Tulafono. A e silasila i ai lau Afioga e le o avea i se Komiti, e uma le faitauga lona lua ona auiliili loa lea, e leai se avanoa e toe taofiofi ai vaega o le Tulafono lenei. Ae lagona lou faanoanoa, o le Tulafono lea ua aumai o le Tulafono a le Malo, e auai uma le Malo, o le Malo o le Palemia, Kapeneta, o Minisita Lagolago. E faanoanoa le loto e leai ma se auiliiliga na aumai i le vaega lenei sei aumai ni o matou manatu ni finagalo o le Vaega Faaupufai lenei. Ma lou faaloalo.

FOFOGA FETALAI: Tulai mai le sui usufono mamalu mo Falealupo.

Afioga Hon Aeau Peniamina Leavaiseeta: Lau Afioga i le Fofoga Fetalai, ou te fia piiama i manatu faaalua i le mataupu lenei ae tatou te lei oo atu i le tulaga foi lele e le toe mafai ai le kia solomuli.

Lau Afioga i le Fofoga Fetalai i le ava e tatau ai ma le faaloalo, e malamalama lelei i lau...a o le lagona o sui usufono nei, e fua pauna o le taua o se mea e fai ai le faaiuga. E silasila lau Afioga, o le mea moni lava ua e saunoa i tulaga o procedure na sau ai, e lei logona, pau lava lea o le mea e fia vaai i ai itumalo i i le Maota lenei e oo mai ai i Komiti, o le mea lena e taua, ona maua ai lea o le avanoa e faafogaina ai, ae le maua i i ituaiga mea faapea. O tatou ua na o se avefeau mo latou finagalo, ae lei logona le Maota nei i tulaga faapea lau Afioga. O le mea lea e tau faaoloolo mau ai i le faatofalaiga i lau Afioga, o le lagona lava o lenei vaega, oo le mataupu i le Komiti ona maua mai ai lea o le aano atoa o finagalo e malilie i ai le atunuu ona atoa ai lea, faafetai.

FOFOGA FETALAI: Ia o lea ua maua le Taitai o le Itu Agai. O le a se isi mea o lea ua malamalama le mataupu?

Afioga Hon Palusalua Faapo II: Lau Afioga i le Fofoga Fetalai, ou te tulai atu ou te faamaualalo atu i lau Afioga aemaise o le faafogafoga mai o Lana Afioga Mamalu O Le Ao o le Malo. Lau Afioga e leai se teena o le...pei ona aumai o le Tulafono ua saina ai Lana Afioga Mamalu O Le Ao o le Malo. Pau

lava lea lau Afioga, e faamalulu atu foi i lau Afioga, ona o le mataupu lenei e ese le tele o le afaina o itumalo, ou te tatalo atu i lau Afioga, ina ia faagasolo, ou te faatu atu le lafo lea, *E faagasolo le Tulafono e pei ona masani ai ma ave i Komiti ona toe aumai ai lea.* O lea e lei taitai le Palota, o le lafo lena e faatuina atu.

E le i faaluaina le lafo.

FOFOGA FETALAI: O lea ua maua atu lau Afioga i le Taitai o le Itu Agai, o lea ua maua lou finagalo. O lo outou finagalo ea e tuu le mea lea ua uma ona faataatia ma saina mai Lana Afioga Mamalu O Le Ao o le Malo ae fai lo outou finagalo? Is that's you want? O le mea lena o lo o outou mananao ai? E le mafai ona tupu se mea faapena o lea ua faataatia galuega a le Maota.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai e fia maua se avanoa.

Tofa Hon Fonotoe Nuafesili Pierre Lauofo (Sui Palemia): Lau Afioga i le Fofoga Fetalai, e i ai lava si mataupu ia e tatau ona ou oo i ai leaga o lea e faafofoga le atunuu.

FOFOGA FETALAI: Malie lau Afioga i le Minisita, sei tuu atu le....

Tofa Hon Fonotoe Nuafesili Pierre Lauofo: Ne i ave sese ma faaeleelea fua le suafa o Lana Afioga Mamalu O Le Ao o le Malo, ona pei e foliga mai o le finagalo o Lana Afioga Mamalu O Le Ao o le Malo e faanatinati ona talanoaina le Tulafono, e leai, e le o le sao lena. O le fautuaga a le Kapeneta i Lana Afioga Mamalu O Le Ao o le Malo e mafua ai ona saina, o le Faaiuga, o le Faaiuga a le Kapeneta, ia faanatinati ona i ai le tatou tulaga o i ai. E fautuaina Lana Afioga Mamalu O Le Ao o le Malo ona aumai ai lea o le saina a Lana Afioga Mamalu O Le Ao o le Malo. Ae na ona ou soso atu faapena, ne i te i faapea o se finagalo o Lana Afioga Mamalu O Le Ao o le Malo, saina, faanatinati ona talanoa le Tulafono, pei o le tulaga lena.

FOFOGA FETALAI: Ia sei tulai mai le Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai ma le mamalu o le Maota. Ona o lea e matau atu, o latou ia e tutulai mai, ua matua matutua lava i totonu o le Maota lenei. Ua leva ona tautua i lo tatou atunuu, ae aliali mai, o le matua vaivai lava o le malamalama i tulaga o Tulafono Tumau. O le isi foi sui usufono sa Fofoga Fetalai, ae tau mai ai, e matua moto 'e'e le tofa, e moto 'e'e le tofa. Silasila foi, o le faavae o le Palemene, o mataupu e aumai e faanatinati, pau lava le pule e faataga ai o Lana Afioga Mamalu O Le Ao o le Malo, e le tau faamalamalamaina foi po o le Kapeneta, ae o ala lena o mea, o ala na o mea, ae le tulia i ni finagalo o se toatasi po o se toalua, leaga e 49 sui usufono o le Palemene. O le mea la lea lau Afioga i le Fofoga Fetalai, ou te manatu au ia pe a talafeagai ma lou finagalo, faagasolo le tatou galuega, o le pepa ua aumai o le Tulafono o le aso

ia ae faapea foi le Pepa o Galuega, ou te talitonu, o lou tiute lena e faagasolo ai galuega. A o le faalavefau ma fue lolou ulu ia e aliali mai, e tau mai ai, e na ona matutua i le Maota ae le faitauina a latou Tulafono Tumau. Ma le faaaloalo.

FOFOGA FETALAI: Ia o lea ua ou maua le finagalo....

Afioga Hon Palusalue Faapo II: O se mea e fia faasao lau Afioga i le Fofoga Fetalai....

FOFOGA FETALAI: Ia malie lau Afioga i le Taitai o le Itu Agai....

Afioga Hon Palusalue Faapo II: Leai e tatau lava ona faasao le saunoaga a le.....

FOFOGA FETALAI: O lea ua uma o lea o le a ou faasaoa, taatia mai ia te au e filemu ai, aua a e tulai mai nei foi e.....

Afioga Hon Palusalue Faapo II: E fai a outou faaiuga e sese.

FOFOGA FETALAI: Malie sui usufono mamalu, ou te manatu o lea ua taatia i le agatonu, Papalii, alofa maia i le tatou galuega o lenei ou te taumafai atu....

Susuga Hon Papaliitele Niko Lee Hang: Lau Afioga i le Fofoga Fetalai, o se mea laitiiti lava lea e fia malamalama ai.

FOFOGA FETALAI: Ia sei faapuupuu mai la.

Susuga Hon Papaliitele Niko Lee Hang: Faafetai i lau Afioga. O le faasalalaua lea na alu atu anapo i le Televisi, na faasalalau atu ai le Tulafono lea e valaaulia ai ni molimau. O le uiga la o lea mea e tatau ona alu i se Komiti ina ia omai la ni molimau e faaali ni o latou finagalo e fesoasoani ai i le Tulafono lenei. Ou te fia malamalama la po o le a le uiga o lea faaaliga, faamolemole?

FOFOGA FETALAI: O lea ua maua lou finagalo Papalii, o le faasalalaua na tuuina atu anapo, o le faasalalaua a le Failautusi e faailoa ai i le atunuu, o le a tuuina mai le Tulafono lenei i le Fonotaga lenei. O le faasaoga lena, e lei i ai se Tulafono ua faasalalau i se tulaga, o le faasaoga o au nei na vaai lelei i le Televisi anapo ma molimauina ai le tulaga lea. Ae malilie le tatou Maota.....

Tofa Lealailepule Rimoni Aiafi: Lau Afioga.....

FOFOGA FETALAI: Le sui usufono mo Faleata Sisifo, alofa mai o lea ua fai lau faaiuga. Malilie finagalo o sui usufono o le Maota Fono, o lea ua uma ona faataatia le finagalo o le Malo, o lea ua saunoa le Palemia, saunoa le Sui Palemia, o lea ua manino le mata o le vai, ua uma ona agai suesuega a le Kapeneta i le mataupu lenei.

Tofa Lealailepule Rimoni Aiafi: Lelei lau Afioga. Faafetai, e le taofia e Lealailepule le talanoaina o le Tulafono, e le taofia e Lealailepule. E pau lava lau fautuaga i lau Afioga, ia manatu lelei, afai ua tatou vevesi i le taeao i le Tulafono lenei, ia manatu lelei i le lumanai o Samoa ma le atunuu ma ana faiga faavae. E eseese Tulafono, e eseese. O le Tulafono lenei, o le Tulafono lea o le a fau ai le Malo i le agai i luma. Po o sao ma lelei ona faataatia, ae le taofia e Lealailepule. O lau fautuaga, ia fai faalelei le tatou Fono ma le Maota o Samoa, e le faigofie mea nei.

FOFOGA FETALAI: O lea ua ou maua lou finagalo, le sui usufono mo Faleata Sisifo. Ou te manatu ua manino ua ou taofia felafolafoaiga, ua manino le mata o le vai. Aua tou te atugalua i tulaga o lea e faafoefoe ai le tatou Fono, o le faasologa o le tatou mataupu lenei o le a alu nei, o lea e tatala o outou finagalo, silasila i le mea lea o le a fai, faitau faa-tasi, faitau faalua, auiliili, faitau faatolu. O le taimi la lenei, ia tatala mai la le mea lena o lo o outou nonofo ma outou. O outou o sui usufono o itumalo na outou omai e saili ma fai upu o le atunuu.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ne i te i ua soona mamafa tele i finagalo o sui usufono, ae a tomanatu i le Tulafono lenei, o le faiga faavae lea a le Malo, e uma loa lea Faiga Palota faatu le Komisi Suesue, silasila totoa i ni faiga e taumafai ai ina ia faaleleia atili a tatou Faiga Palota, ina ia agai i luma ae le o le solo i tua. O faaiuga uma lava la o a tatou Faiga Palota, e iloa ai lava tulaga faaletonu. O lona uiga, o nei foi teuteuga tatou te faia nei, e le iloa pe taumafai atu foi e fai nei ae oo foi i le Faiga Palota lea o le a sosoo nei, toe talepe, ae talepe lava e sui faatutu. Ou te manatuaina le taimi lau Afioga i le Fofoga Fetalai, na fai ai le iuga a le Faigamalo lenei, e tataua ia ona fai ni a tatou ID, ina ia taofia ai le mea lea o le omai o isi tagata palota i igoa o tagata ua feoti, ae sa pepese aleluia le atunuu i lena taimi, o le fofu lea o lenei mea o le faaoga sese o igoa.

Lau Afioga i le Fofoga Fetalai, na fanau mai ai i ina isi mau faaletonu e tele, ua nofonofo tagata ae le fia omai seiloga e o atu sui e talau mai, ia totogi, sa lei mafaufauina o le a tulai mai ai ni tulaga faapea. O lona uiga lau Afioga i le Fofoga Fetalai, o a ni fautuaga mo le faaleleia o le Faiga Palota, ou te talitonu, e oo nei foi i le isi Faiga Palota, ua tele foi isi mau mea piopio e tulai mai ai, e le faapea o le a uma ai i inei. O lona uiga e fai pea fai pea fai pea, ina ia oo lava i le tulaga ua pei ai lava o lea tatou te i le Parataiso, e leai se mea pio e toe faia. E tasi lava la le agaga o le Tulafono lenei, ia faaleleia, e le o se agaga e faaleaga ai lau Afioga i le Fofoga Fetalai, ma ua tatou lailai tatou nei, ua tatou lailai i le anoano o faaletonu e tulai mai, ae mafua mai lava i sui faatutu i lea Faiga Palota ma lea Faiga Palota, e taofi atu lea pio ae manu ae isi mau magio.

Lau Afioga i le Fofoga Fetalai, o se taumafaiaga a le Malo o lo o taumafai atu ina ia tatou taunuu ia i se taimi, ua le toe i ai lava ma se faaletonu. O le agaga lena. Ne i te i ua faapea ae e i ai nisi togafiti leaga o tatanu ai i lalo. O le taumafai e faaleleia a tatou faiga filifiliga.

Afioga Hon Palusalue Faapo II: Lau Afioga ou te faaooloo maau atu i se avanoa laitiiti lava lea. E leai e le o se faamatalaga foi lea e tetee ai i le saunoaga a le Afioga i le Palemia, leai o le agaga lena o le Itu leni faalelei le Faiga Palota. Pau lava lea lau Afioga i le Palemia e auala atu, sei silasila totoa leaga o lea ua e saunoa i le Komisi Suesue e maua ai avanoa, leai o faagasologa o mea Faa-Palemene e tatau ona ave i le Komiti, o lea ou te tatalo atu i lau Afioga. Afai e sao au saunoaga masani o pulega manino ma pulega lelei, accountability and transparency, o le mea lea e tatau ona fai i le mea lea (*tuitui lona aao i luga o le laulau*). Ou te tatalo atu ai lau Afioga, tatou faagasolo i le tulaga masani, e aumai i le Komiti, maua le avanoa ma le aiatatau o sui usufono o le atunuu, o lou ai lena lau Afioga.

E pei o le tatalo lea lau Afioga.

FOFOGA FETALAI: Ia, o lea ua maua le finagalo malie o lau Afioga i le Fofoga Fetalai. Sei tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sei ou toe fai atu lava le mea lea, o le tatou Malo lea e faafoe i faiga faatemokarasi. O le a le uiga o le faatemokarasi? O le mea e fulisia i ai le toatele. E i ai le taofi o se faiga faatemokarasi, o lea faiga e piopio foi faiga faatemokarasi, a o le faalavelave, e leai lava se isi faiga e sili atu na o le faiga faatemokarasi, o lea la e sosolo ai lava le tatou Faigamalo. A o le mea lena e te finau mai ai, ana ou nofo foi i ina ma se matou vaega e toasefululua e le ato ai se Kapeneta, o tala foi na ou te faia. A o a la tala e te faia? O tala uma foi nei ou te fai atu, e te tali atu foi i le tali faatemokarasi. Aua o le lalolagi leni, e fai o le isi mea, a o la e foi e i ai le isi tulafono e faafoe ai a tatou galuega. O le faatemokarasi lea tatou te o ai, e le o ni a tatou aga, a o aga na faataoto mai e o tatou matua na pasia le Faavae, o le temokarasi e faagasolo ai faiga faavae ma faaiuga a le tatou Palemene.

FOFOGA FETALAI: Ia, ou te manatu ua malamalama ma manino le mataupu leni. Afai foi e lagalaga finagalo o sui usufono, ua tatau foi ona lagalaga aua e le o se mataupu e i ai le tulaga o le tago faatumutumulima ma i ai le manatu faatauvaa o le Maota. E faamalulu atu foi i saunoaga ma tuleiga ma lafoga o leni taeao, e fai foi o le lafo atu a o le lafo mai.

Afioga Hon Aeau Peniamina Leavaiseeta: Lau Afioga i le Fofoga Fetalai....

FOFOGA FETALAI: E faamalulu atu ai i lau Afioga i le Minisita aemaise foi o sui usufono mamalu uma o Minisita ma... Malie le sui usufono mo Falealupo o lea ua avatu le Faaiuga a le Nofoa. Ou te manatu ua taatia i lagatonu le mataupu.

Afioga Hon Aeau Peniamina Leavaiseeta: Ioe, ou te faamalulu atu ona o lea sa taua lou igoa e...

FOFOGA FETALAI: Ia, a lea o le a ou agai i ai? Aeau, malie mai.

Afioga Hon Aeau Peniamina Leavaiseeta: Ou te lagona e le mafai ona e faasaoa ae sili ona ou faasaoa, leaga o le tulaga faapea, e le mafai ona soona faamaga se isi i totonu o le Maota lenei, e alu i luga o tatou tu ma aga, o le vatapuia. Leaga, o le igoa sao lava o le sui usufono lea, o lea la o le a ou le fai atua. A o le mea e fua i luma fua i tua, aua nei toe faia, aua nei toe faia.

FOFOGA FETALAI: Aeau, a i ai ni ou alofa o oe o se tasi o sui usufono matua o le tatou Maota.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, e lei taua e Tolofua se igoa o se sui usufono, o le sa avea ma Fofoga Fetalai o le Maota. O la e manino lau tala ou te lei taua se... A o le upu lava latou e masani ai, afai lava o le ituaiga tofa lea ua aumai, o le tofa moto, o le tofa motoe'e, apulupulua, o le tofa lena. Ou te le fefe e tau atu le mea lena leaga o lea e aliali mai, o tagata na, o fue louulu ia o lea e i totonu o le Maota, e taumafai lava e faaleaga se mea, a o la e malamalama i le Tulafono Tumau lau Afioga.

FOFOGA FETALAI: Ia malie ia lau Afioga i le Minisita mo Tina ma Tamaitai, Atinae o Nuu ma Afioga ma Agafesootai. E pei o le ala lea o le taumafai atu lau Afioga i le Minisita.

Tofa Hon Tolofuaivalelei Falemoe Leiataua: E lelei pe a... leaga e sa ona soona lafo e se isi se upu i le lauga lenei. Ma le faaaloalo.

Afioga Hon Palusalua Faapo II: Lau Afioga i le Fofoga Fetalai, o le a sa pe a faavalevlea au tala.

Tofa Hon Tolofuaivalelei Falemoe Leiataua: Nofu i lalo i te i ua faatu atu se lafo e ave ai...

FOFOGA FETALAI: Palusalua, malie ia, malie ia lau Afioga i le Taitai o le Itu Agai.

Afioga Hon Palusalua Faapo II: E tiga lava ona sese a outou mea ae alu a? Tauto sese...

FOFOGA FETALAI: Ia, malilie le tatou Maota, out e talitonu lava i lenei aso ma le felafolafoaiga, ia tatou maua le agaga o le fefaamagaloi. O le ala lea e te tulai mai Aeau, o lea ua ou agai i le Afioga i le Minisita na faia lafoga. E faamalulu atu foi i lea Itu o le Maota o suaga o le vaatele ma upu felavasai ma felafoai i le tatou va nonofo ai, e le o ni ai e avea. E talitonu foi o la e i ai le tofa ma le faautautaga, o upu lava faafaleupolu pe a tatou o, o lea foi ua ou faamalulu atu. Aua foi nei tenaia lo outou finagalo i tuleiga ma saunoaga, aua a tatou o nei e fai le faataumatatao, ona tuu lea o maa ae maa i aau, o le a le faia le tatou Fono ae o le a tatou finau i luga o mataupu e tatau ona i ai.

Na pau lava lea o le tulaga e tatau ona ou tulai atu e faamalamalama le Maota, ona o le lafoga e faitogafiti. O le lafoga lena lea na mafua ai ona ou taumafai atu. Ia malie lau Afioga i le Taitai o le Itu Agai, ia vaatele lou

finagalo. Silasila foi i le faasologa o mataupu ua uma ona tulai mai, o lea ua tulai le Afioga i le Palemia faamalamalama le mataupu, e le na o outou e aafia i le mataupu lenei, o tatou uma o sui usufono mamalu o le Palemene, o tatou e o e fai tofiga mai le atunuu, mai ia Samoa. E le faapea la e aafia outou ae le aafia au, pe aafia outou ae le aafia lea Itu o le Maota. E tatou te i le vaiiliu e tasi ma le sa e tasi, a lagona ma taia le taele o le sa, tatou te aafia uma lava, ae lafo le faatuatuaga, ou te talitonu le paia ma le mamalu o le Maota, o la outou tofa saili ma la outou motugaafa ma le tofamau ma le tofa tatala, e manino ai mea i totonu o le Maota Fono lenei. O lea la ua taatia i lagatonu le finagalo o le tatou Malo, fai le auala lea. Ua uma ona saunoa le Afioga i le Sui Palemia, e le o se faaiuga a se toatasi, o faaiuga a le Kapeneta ma le Minisita e a ia le Tulafono. O lea ua molimoli i aao o Lana Afioga Mamalu O Le Ao o le Malo. O ai la se isi o i sili? Silasila o lea e faafofoga Samoa ua uma ona sainsi Lana Afioga Mamalu O Le Ao o le Malo? O lagona na, e ta te taliu ae popoe, o Lana Afioga Mamalu O Le Ao o le Malo, o le faatumutumuga lena o le Palemene. Ia a fai atu nei tatou mea ua tatou soalaupule ae toe teena le finagalo o le Toeaina ma lana endorsement lea ua aumai, o itu ia le paia ma le mamalu o le Maota. Ae le o ni ai avea, o lea o le a tatou faasaga e fai Tulafono, faitau faatasi, faitau faalua, faitau faatolu, ia sauna mai la? Fofola le ie o auafa, fai le tofa a le tagata i le mea lea e i ai le atugaluga o lona finagalo. A o le Malo, latou te sailiili i itu uma e ala ai ona mafua ona tatau ona faanatinati se mataupu, ma tatau foi ona faagasolo i tatou tulaga masani. O lea le paia o le tatou Maota, afai e lagalaga a outou finagalo, sala ina lagalaga, leaga o le mataupu e sili ona taua, a o i e iloa ai tautai matapalapala mo aso faaletonu. Sauni mai ou tootoo ma a outou pa fagota ma mea uma o lea o le a tatou o i le sousou o le vasa, po o fea e agai i ai, po o le lafala po o le laafa, ma fola i le savili ma fola i le agai i luma mo le tatou mea lea o le a alu. O lea o le a tulai mai le Afioga i le Minisita e a ia le Tulafono Tau Faaofi, ona tatou pigi lea sei faamalamalama le mataupu. Ae alo mai, e le o ni ai avea e le faapea o le a faanatinati ona alu ai lava lea pei o le puluafi, e leai, e faitau faatasi, faitau faalua, iloilo, pasi, faatoa uma. A outou tetee, faitalia outou.

TULAFONO TAU FAAOFI O TEUTEUGA O LE TULAFONO O FAIGA PALOTA 2014 – faitauga muamua

Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga, Komisi o Faiga Palota): Faafetai lava i lau Afioga i le Fofoga Fetalai. Ou te manatu ua taoto i lagatonu le mataupu sa felafolafoai ai foi le Maota i lenei taeao, o lea ua fai le faaiuga a lau Afioga i le Nofoa. E tele foi itu taua ua maua atu i saunoaga faaaliga, aemaise foi le faaaliga a le Palemia, o lo o tatou sosolo pea i luga o faiga faatemokarasi. Fai mai le toeaina o Churchill, “E lelei lava le temokarasi ae leai foi sona ia atoatoa, a o le mea aupito sili ona lelei lea e mafai ona tatou o ai.”

Lau Afioga i le Fofoga Fetalai ae ou te te lei faatuina le lafo, ua ou manatua ai lava le isi tala, o le tala i le Malo i Amerika. Ua maea loa le talosaga o le taeao ua afifio atu foi sui faipule o Maota e lua o le a fai le malutaeao, o le malutaeao e nofoia lelei, e taitoavalu i le laulau lapotopoto. Mai na laulau, ua seti lelei ai ipu ma tulaga uma e faatino ai le taumafataga. E i ai la le ipu

laitiiti o lo o tuu ai le fasi falaoa vaeane lau Afioga ma le fasipata, ae alu atu loa le Senate o ia lena sa fai ma lauga aami o lena taeao ua taumafa lana falaoa ae manaomia se isi ana pata e le lava le pata. Ona valaau atu loa lea i le tamaitai o le Maota, "Faamolemole sau." Alu atu loa le teine fai atu le Senate, "Toe aumai se isi au fasipata." Ae fai mai le teine, "Malie lou finagalo, e tasi lava le fasipata a le tagata." Faapea mai loa le Senate, "Oi, talofa e mafine, ailoga o e silafia lelei au." Fai atu i ai le teine, "O lea ou te iloa lelei lava lau afioga o oe o le Senate, o lau afioga ua lauiloa i upufai. Ae e te lei oo mai i upufai, sa fai oe ma tagata taalo ua iloa e le lalolagi, ae peitai, malie ia lou finagalo, e tasi lava le fasipata a le tagata." Ona fai atu loa lea o le Senate, "Oi, tamaitai, lelei la o lena e te iloa au, a o au la, ou te le iloa po o ai oe ma lau tala lea e fai mai?" Ae fai mai le tamaitai, "Lau Afioga i le alii Senate, o au, o le tamaitai e pule i le pata."

O le uiga la o lau faamatalaga lau Afioga i le Fofoga Fetalai, ua tatou talanoa i lena taeao i pule ma malosi ma tulaga faapena, o le uiga lena o le tatou nonofo ai, e i ai a tatou pule e fetalai, saunoa atu, aumai, ae tatou te saili lava po o fea le auala lea o lo o taatia ai a tatou pulega faamatafaioi. Ua umi la si au faamatalaga lau Afioga i le Fofoga Fetalai sei tau faamalie ai foi le tatou taeao pei ua faavesivesi, ae ua nofo sauni lava le Komesina ma le Ofisa e tapena mai le Tulafono Tau Faaofi e tusa ai ma le faaiuga a le tatou Komisi Suesue. Ae le gata foi i lea, o fautuaga aloaia ua auala mai i le laulau a le Kapeneta.

Ma o lea ou te fiafia lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota 2014 i lona faitauga muamua.*

Faaluaina e le Sui Palemia, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota 2014 i lona faitauga muamua.

TULAFONO TAU FAAOFI O AUAUNAGA FAA-SOIFUA MALOLOINA A LE ATUNUU 2013 – iloiloga auiliili

FOFOGA FETALAI: E tusa ai ma le Tulafono Tumau 106, e tataua ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioga ma Agafesootai.

Afioga Hon GATOLOAIFAANA AMATAGA ALESANA GIDLOW (Taitaifono o le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioga ma Agafesootai): Faafetai atu i lau Afioga i le Fofoga Fetalai mo le avanoa. E faatalofa atu foi i le paia ma le mamalu o le Palemene po o le usugafono foi a Samoa i lena taeao aemaise foi le faafogafoga mai o le tapuaiga a si o tatou atunuu.

Lau Afioga i le Fofoga Fetalai ou te tulai atu ma le ava ma le faaaloalo e faatu le lafo, *Ina ia faagasolo le Tulafono Tau Faaofi o Auaunaga Faa-Soifua Maloloina a le Atunuu 2013 faatasi ma Teuteuga ma le Faasaoga.*

Faaluaina e se tasi o sui usufono mo le Au Palota Taitoatasi, Susuga Hon Papaliitele Niko Lee Hang ma le sui usufono mo Aleipata Itupa i Lalo.

FOFOGA FETALAI: Ou te faasilasila atu ua faamaonia nei e le Fono Aoao le Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioaga ma Agafesootai i le Tulafono Tau Faaofi o Auaunaga Faa-Soifua Maloloina a le Atunuu 2013.

O le a sagai atu loa le Fono AOao i le iloiloga auiliili o le Tulafono Tau Faaofi o Auaunaga Faa-Soifua Maloloina a le Atunuu 2013.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faaaogaina ma le faamoemoe.

Faamaonia.

FUAIUPU 4: Faaauauina o le Auaunaga.

Faamaonia.

FUAIUPU 5: Galuega tauave ma malosiaga.

Faamaonia.

FUAIUPU 6: Komiti Faatino o Faatonu a le Auaunaga.

FOFOGA FETALAI: O lo o i ai le Teuteuga a le Komiti i le Fuaiupu 6 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le Fuaiupu 6(a) e faapea:

“TEUTEUGA:

1. *Ia faaofi upu “ma o se sui resitala a le Asosi Fomai a Samoa” i totonu o le fuaiupu 6(a) i le tuanai ai o le upu “faamauina” ma faitauina ai le (a) e faapea:*

“(a) e toatasi (1) se fomai faamauina; ma o se sui resitala a le Asosi Fomai a Samoa.”

2. *Ia faaofi upu “ma o se sui resitala a le Sosaiete Tausisoifua a Samoa” i totonu o le fuaiupu 6(d) i le tuanai ai o le upu “faamauina” ma faitauina ai le (d) e faapea:*

“(d) e toatasi (1) se tausisoifua faamauina; ma o se sui resitala a le Sosaiete Tausisoifua a Samoa.”

3. Fuaiupu 6(7):

Ia aveese le fuaitau “faafuaiupu (1)(d)” ma suia i le “faafuaiupu (1)(e)” ma faitauina ai le fuaiupu 6(7) e faapea:

“(7) O se faatonu ua faamutaina lona tofiga i lalo o le faafuaiupu (1)(e) e le tatau ona toe tofiaina i luga o lea tulaga e faaauau e avea ai o se faatonu.”

Faamaonia le Teuteuga.

Faamaonia le Fuaiupu 6 e pei ona Teuteuina.

FUAIUPU 7: Vaitaimi i le tofi, avanoa ma le aveesea.

FOFOGA FETALAI: O lo o i ai le Teuteuga a le Komiti i le Fuaiupu 7 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le Fuaiupu 7(3)(n) e faapea:

“TEUTEUGA:

Ia faaofi upu “ma alu ese mai” i le tuanai ai o upu “ua tuua” ma faitauina ai le fuaiupu 7(3)(n) e faapea:

“(n) ua tuua ma alu ese mai Samoa e le toe foi mai.”

Faamaonia le Teuteuga.

Faamaonia le Fuaiupu 7 e pei ona Teuteuina.

FUAIUPU 8: Taitaifono ma fonotaga a le Komiti Faatino.

Faamaonia.

FUAIUPU 9: Faamaumauga o mataupu o fonotaga ma totogi.

Faamaonia.

FUAIUPU 10: Faailoaina atu o aia feteenai.

Faamaonia.

FUAIUPU 11: Faatonuga faa-Minisita.

Faamaonia.

FUAIUPU 12: Pule Sili ma le aufaigaluega.

Faamaonia.

FUAIUPU 13: Pulega o auaunaga faa-soifua maloloina.

Faamaonia.

FUAIUPU 14: Tuuina atu o malosiaga.

Faamaonia.

FUAIUPU 15: Faamatalaga faa-soifua maloloina tau le tagata lava ia.

Faamaonia.

FUAIUPU 16: Tupe a le Auaunaga.

Faamaonia.

FUAIUPU 17: Faamatalaga tau tupe ma le sueina faasuetusi.

FOFOGA FETALAI: O lo o i ai le Teuteuga a le Komiti i le Fuaiupu 17 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga ina ia suia le Fuaiupu 17(4) ma le (5) e faapea:

“TEUTEUGA:

“(4) E ao i le Auaunaga ona faaoo atu i le Minisita, i totonu o le fa(4) masina i le maea ai o faaiuga o tausaga faaletupe taitasi:

- (a) lana lipoti faaletausaga, e aofia ai se ata o ana faamatalaga tau tupe ua maea ona sueina faasuetusi, mo lea tausaga; ma**
- (b) le lipoti a le Suetusi.**

“(5) E ao i le Minisita ona faaoo atu lipoti ua taliaina i lalo o le faafuaiupu (4) i le Fono Aoaofa i se taimi vave lava pe afai o tauaofia le Fono, ma afai e leai, i le amataga o le aso fono e sosoo ai.”

Faamaonia le Teuteuga.

Faamaonia le Fuaiupu 17 e pei ona Teuteuina.

FUAIUPU 18: Malosiaga o le Suetusi.

Faamaonia.

FUAIUPU 19: Totogifuapauina ma tau faaee atu.

FOFOGA FETALAI: O lo o i ai le Teuteuga a le Komiti i le Fuaiupu 19 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le Fuaiupu 19 e faapea:

“TEUTEUGA:

Ia faaofi le faafuaiupu (5) fou i le tuanai ai o le faafuaiupu (4) e faapea:

“(5) O le le mafai ona lomua faasalalau o le faasilasilaga o i lalo o le faafuaiupu (2) i totonu o so o se isi lava nusipepa o lo o faasalalauina i Samoa, o le a le aafia ai le tulaga aloaia o totogifuapauina ma tau faaee atu.”

Faamaonia le Teuteuga.

Faamaonia le Fuaiupu 19 e pei ona Teuteuina.

FUAIUPU 20: Faamatalaga molimau e ala i tusi faamaonia.

Faamaonia.

FUAIUPU 21: Aloaia o gaioiga.

Faamaonia.

FUAIUPU 22: Puipuiga mai noataga.

Faamaonia.

FUAIUPU 23: Taiala.

Faamaonia.

FUAIUPU 24: Teuteuga o le Faamatalaga.

Faamaonia.

FUAIUPU 25: Tulafono Faatonutonu.

Faamaonia.

FUAIUPU 26: Faagaoioiga o galuega i le Matagaluega.

Faamaonia.

FUAIUPU 27: Soloia ma soloaiga.

Faamaonia.

FUAIUPU 28: Teuteuga faatupulaia.

Faamaonia.

FAAMATALAGA

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Tulafono o Auaunaga Faa-Soifua Maloloina a le Atunuu 2013.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa e pei ona faaalia i le Pepa Faaopoopo o Galuega. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuaiupu 2013 ma suia i le fuainumera 2014 ma faitauina ai le Igoa o le Tulafono e faapea:

Tulafono o Auaunaga Faa-Soifua Maloloina a le Atunuu 2014.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Auaunaga Faa-Soifua Maloloina a le Atunuu 2014 faatasi ma Teuteuga ma le Faasaoga.

TULAFONO TAU FAAOFI O TEUTEUGA O LE TULAFONO O FAIGA PALOTA 2014 – faitauga faalua

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo i le Tulafono Tau Faaofi lenei, o lea o le a sagai atu loa le Fono Aoa o lona faitauga faalua.

Tulai mai le Afioga i le Minisita mo Faamasinoga, Pulega Tau Faamasinoga ma le Ofisa o Faiga Palota.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota 2014 i lona faitauga faalua ma ou te fia tautala faamalamalama i ai.*

Faaluaina e le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai maia lau Afioga i le Minisita e saunoa faamalamalama i lenei Tulafono Tau Faaofi ua vavao ai le taeao.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o lenei Palemene, o lenei Tulafono Tau Faaofi o lo o teuteuina ai le tatou Tulafono o Faiga Palota 1963, ina ia aloaia ai Fautuaga a le Komisi Suesue lea na amatalia i le 2012 i le maea atu o le tatou Faiga Palota talu ai. Ma i le faaiuga o suesuega a le Komisi Suesue na faapea ona faasolo atu ai i le Kapeneta ma aumai ai loa le faaiuga a le Kapeneta e fautuaina le Palemene i le Tulafono ua teuteuina ma ua saunia e le Ofisa o le Loia Sili.

Ma atonu e le tau faamatalaina, o nisi o suiga ogaoga o lo o tuuina mai i totonu o le tatou Tulafono Tau Faaofi fou lenei, o le faavaeina lea o ni a tatou

itumalo tu taulaga. Ma e le gata i lea, a o le a suia mai ai le vaega sa i lalo o le Lola a le Palota Taitoatasi, o lona uiga ua le toe i ai se lola faapea.

I le talafaasolopito o Faiga Palota ma upufai o Samoa, ou te iloa o se isi lenei o suiga ua tatou laa atu nei i ai, o lea o le a tasi lava le lola o le a faatino ai Faiga Palota i totonu o Samoa. Ma i le tasi o lona lola i le Tulafono Tau Faaofi lea, o lea o le a faaopoopo i ai itumalo tu taulaga e lua ma e le gata i lea, o le a vaevaeina a tatou itumalo ia o lo o iai sui usufono taitoalua. O lona uiga, o le a tatou toe foi i le tulaga e tasi le itumalo, tasi le sui usufono. O suiga na e le taumate o suiga ogaoga ma e atonu foi o mataupu ia o le a saunoa i ai nisi i le tatou Maota.

O le vaaiga lava i le tulaga lea i tatou itumalo fou ia tu taulaga, o le itumalo o Vaimauga ma Faleata, ua tatou maitauina i le tele o Faiga Palota ua mavae, e faatupulaia pea fuainumera o ia itumalo. Ma e mafua lea ona o le autovaa mai o le atunuu ua afifio ma alaatai i le tele o fanua umia saoloto i totonu o itumalo ia e lua ma ua avea ai foi latou ma tagata palota o ia itumalo. Ona o le faiga faavae a itumalo ma tatou Faiga Palota o lo o sosolo pea i luga o vaevae faaleaganuu i nuu ma afioaga ma alaafaga, ua tupu ai se manatu aemaise o tatou itumalo ia tu taulaga, ua aveesea atu le pule po o le aia a i latou e faasino tonu i afioaga i totonu o itumalo nei e lua o Vaimauga ma Faleata, ia vaeane o se upu lata mai, a o tagata ese ua fai mai ma nonofo i totonu o tuaoi o itumalo ia e lua. Ma e atonu o le isi vaega tele lea sa silasila i ai ia le tatou Komisi Suesue ae o se mataupu foi ua leva ona tatou faatalanoaina i le maea atu o ia Faiga Palota ma ia Faiga Palota.

O le lola o palota taitoatasi, ua leva foi ona tatou talanoaina ia le tulaga lea. Pe o talafeagai pea le faaauau o le lua o Lola e fai ai le faiga palota i totonu o Samoa, pe tatou te tuutuu foi i le loloto ma faapea, ua lua ituaiga tagata o i totonu o le atunuu, tagata lautele lea e palota i itumalo i nuu ma alaafaga ma palota o lo o fai i luga o le lola o le palota taitoatasi. E i ai nisi o tatou e lava le matutua o lo o tatou manatua pea, i le amata mai o le Palemene o Samoa e lima sui o le Palota Taitoatasi, fai fai lava faaitiitia pea, faaitiitia pea, faaitiitia pea, ma e le gata i lea, e le faapea o le soloai mai o le Palota Lautele i le lisi o le Palota Taitoatasi, a o le mea ua tupu e matai loa le tagata o lo o lesitala i lalo o le Palota Taitoatasi, ia ua soloai atu i o i le Palota Lautele. O lona uiga, ua amata lava ona tu-gatasi le ituaiga faavae o lo o alu ai a tatou faiga palota, faavae i luga o suafa matai. Ma o lea ua alu alu lava le tatou Palota talu ai na i ai le suiga e faatumauiina pea ia le lisi o palota taitoatasi, a o le suiga ua mafai ona o ai matai. O lea la tatou te manatua ma tatou molimauina, o lea na tauva ai sui tauva i o latou suafa matai, o lea la e tulai mai ai a tatou sui o lo o i ai nei, Afioga ia Maualaivao faapea ma le Afioga ia Papaliitele, a o le lisi o le Palota Taitoatasi. O lea la ua tatou laa atu i le isi laasaga i le agaga lea, tatou taumafai e aumai e tasi lava le ituaiga lola e fai ai le palota a tagata Samoa, o tatou o tagata Samoa ma e tataua ona tutusa i o tatou agavaa.

Ae o lo o i ai pea ia vaega o lo o tumau pea, aua o le isi lava vaega sa faatauaaina ia sa i ai i le Palota Taitoatasi, o tagata o e o lo o nonofo i luga o fanua umia saoloto, o le isi criteria lona sa fuafua i ai i latou sa i ai i le Lola lea. O lona uiga, e le o ni tagata e lavea i lalo o ni pulega faa-Matai, aua o fanua Faa-Samoa e i lalo o pulega faa-Matai. O le tatou suiga la lea ua i ai nei aemaise itumalo fou ia tu taulaga, ia ua faapitoa lava ona tuaoi i itumalo o Faleata ma le itumalo o Vaimauga, aua o itumalo ia, o lo o faapea ona molimauina pea i tausaga taitasi le faaopoopoina o le fuainumera e ala ia i

latou o autovaa mai i vaega eseese o le atunuu ma alaalatai ai i totonu o itumalo ia.

Atonu o lena o le a outou silasila ma faitau i le tatou Tulafono ia ma malamalama atili ai i ia fuafuaga. O le isi fuafuaga e tatou te talanoa pea i ai, o tatou o’o ia po o tatou momoli, po o le a le taimi e talafeagai ai ina ia le atagia ai ni faiga faatosina po o ni faiga faasolitulafono? Ia o lea foi ua tatou oo mai i lenei tau, e le taumate o lea lava o lo o aliali mai e faatauaina pea i le tatou atunuu le faia o tatou o’o o auala ia e talia ai ia sui tauva ma o latou nuu ma o latou itumalo i tulaga o le aganuu, i le filifilia ma le tofia i le tofi faipule. Ma o le fuafuaga o lo o taatia mai i lenei Tulafono Tau Faaofi, o le tuuina atu lea i le faia lea o tatou o’o i le maea ai o le lauina mai o le faaiuga o le palota. Ma i le faia foi o o’o, e tataua ona faatino i totonu o le sefululua masina i le mavae atu o le faaiuga o faiga palota. O lona uiga, o le a tuu mamao lava faiga o momoli ma faiga o o’o mai le taimi e ono toe vevela i isi faiga palota ma a tatou campaign e pei ona masani ai.

O le isi vaega e masani ona tatou finau ai ma vevesi ai, o le faamaonia lea o le tagata e lesitala i totonu o lea itumalo ma lea itumalo. E pei o le faiga palota talu ai sa tatou faataitai ai se faiga fou ua i ai i le pulenuu, le malosi e aumai ai lana faamaoniga o le tagata lea e faamaonia o le tagata nuu, e nofo i le nuu e fai lana tautua, e fai lana monotaga ia aemaise e fai ona alofa i le faifeau. Ae peitai, ua i ai foi se lagona i mau na avatu i le tatou Komisi Suesue ia o ni manatunatuga foi faale-Tulafono, e le o i ai se atoatoaga i se tagata e toatasi e mafai ai ona fai e ia lena galuega e aunoa ma ni pa puipui faale-Tulafono. Ma e o lea la o le suiga ua aumai ai mo le faamaonia o le tagata e fia tuuina atu i se Lola palota aemaise o sui tauva, aua o le sui tauva lava le auga o le tatou finauga sa fai ai i le mea lea ma faamaonia ai e le pulenuu, ua tataua ona saunia ia sana pepa faale-Tulafono e alii loia poo tamaitai loia e faamaonia ai ia ona agavaa uma e mafai ai ona avea o ia ma tagata palota ia po o se sui tauva foi, mai lea itumalo ma lea itumalo.

O le vaega la e 13 o le Tulafono lenei ae toe foi atu i tua lau faamatalaga, o le vaega e 13 o lo o i ai le malamalamaga faalauaitele i le fuafuaina o tatou itumalo, aemaise itumalo ia e tailua o latou sui ma le vaeveaina o le a i ai, o nuu i totonu o le isi vaega ma nuu i totonu o le isi vaega, o lena o le a outou maua i le vaega e 13. Ae pei foi ona silafia e lau Afioga ma le mamalu o le Palemene, e i ai foi isi Tulafono e tataua ona suia – ma e i ai le tatou Tulafono o le vaeveaina o tatou itumalo, ma e tataua foi ona faasolo atu i lalo o le Tulafono lenei ia le suiga o lena Tulafono. Sa laga e se tasi o sui usufono le tulaga o le suiga o le Faavae. Ia e moni lava ma a silasila i ai i le Igoa Puupuu o le tatou Tulafono, o lena o lo o faapea mai ai, ‘o lenei Tulafono e amata faamamaluina i le aso e tuuina i ai le maliega a Le Ao o le Malo i le noatia ma le fai fuafua i le Fuaiupu 1(2), (3) ma le (4) o le Tulafono o Teuteuga o le Faavae.’ Ia o lona uiga e i ai foi le isi fasitepu o le tatou taumafaiga, a o le tino lava ia i le faagaioiga o le galuega a le Komesina o Faiga Palota lea ua tapena mai i le tatou Tulafono lea.

Lau Afioga i le Fofoga Fetalai, atonu o le pau ia o nai mataupu e fia oto mai ia atonu o le agaga autu foi e pei ona ou tautala atu i ai, ia o suiga o lea o lo o i totonu o le tatou Tulafono. Ma lou faaloalo lava.

FOFOGA FETALAI: Malo faafetai saunoa i lau Afioga i le Minisita e a ia le Tulafono lau Afioga i le Minisita mo Faamasinoga ma Pulega Tau

Faamasinoga. ia e manatu foi ua logona ma ua faafofoga le Maota e ala i lau folasaga manino. O le taua lena o le tuuina mai o le faamatalaga aloaia a lau Afioga i le Minisita e a ia le Tulafono i lenei taeao. E le o toe po malae i le siisii foi o le tai i le tatou taeao lenei ona o lenei Tulafono taua, ona e manatu foi finagalo o sui usufono, e le tuuaunoaina ona o se tasi o Tulafono taua e aafia tele ai tatou tu ma le aganuu e ala i faiga filifiliga a Samoa, a o lo o atagia ai foi nisi o suiga i totonu o le tatou Faavae. A o lea ua e saunoa manino lau Afioga i le Minisita, ia e faafetai atu. E manatu ua manino lava le mata o le vai, ia ua toa foi le tai.

Ma o le avanoa lenei o le a tatala atu i sui usufono mamalu, e fautua atu foi, o le avanoa lenei e mafai ai ona tatou fale le mataupu, le aumai avatu o lo outou finagalo, ina ia logona le Malo o lo o i ai le tofa ma le faautautaga e fetuutuunai ai le taua ma le anoa o outou finagalo e tuuina mai i lenei Tulafono. O le taua lena o tatou felafolafoaiga.

Ia tulai mai lau Afioga i se tasi o sui usufono mo Palota Taitoatasi, Susuga Hon Papaliitele Niko Lee Hang, ona faasolo ai lea o le tatou felafolafoaiga.

Susuga Hon PAPALIITELE NIKO LEE HANG: Ia e momoli atu le agaga faafetai i lau Afioga i le Fofoga Fetalai mo le avanoa taua, e fia faamauina foi le agaga faafetai i le Minisita e ana ia le Tulafono ona o le faamalamalama a auiliili ua tuuina mai, aemaise ai lava le aafiaga o lenei itumalo o le Palota Taitoatasi.

Lau Afioga i le Fofoga Fetalai ou te fia tautala o le sui usufono o le Palota Taitoatasi, o e na palotaina mai au i totonu o le Palemene. Ona o le agaga faanoanoa ona o le tuuina mai o le Tulafono, o lea faatoa ou vaai i le Tulafono i le taeao lenei. E leai la se taimi e auiliili ai ona faitau ma malamalama ai ia ma tapa foi ni finagalo o le itumalo. O le mea moni lau Afioga, sa fono le matou itumalo a o faatalatalanoa e le Komisi Suesue le mataupu lenei, alu le matou savali e nisi o matou i le Komisi Suesue faaali o matou lagona, concerns, i le tulaga o le a suia ai le Palota Taitoatasi. Ia ae sa saunoa foi le Afioga i le Palemia, o suiga uma ia e aumai i le fautuaga a le Komisi Suesue, o suiga e lelei ai ia Faiga Palota. O lau fesili, e leai ma se isi o le Komisi Suesue e aafia e pei o se tagata e avea ma se palota taitoatasi, e malamalama i tulaga o aafiaga o le matou palota i Faiga Palota ua tuanai. E pau lava le mea lea ou te faamaonia o mea ia o o'o o mea faapena, a o le tulaga lava ia o le faagasologa o le Palota aemaise o le lesitala o tagata, o la e leai ma se mea sa faaletonu. O lea foi ou te malamalama i le taumafaiga mai o le Malo ina ia suia Nofoa ia ua fai lava si leva o taumafai mai. A o lea la ua taunuu i le taimi lenei, a o le faanoanoaga la ona o le tulaga ua tuuina mai faanatinati. E i ai lava lou talitonuga, e taua ma ogaoga aafiaga o le itumalo o Palota Taitoatasi i le Tulafono lenei. Ae o se tuualalo lau Afioga po o le a se finagalo o le Malo, sei faagasolo pea i tulaga masani le...e ui ua aumai le saina a Lana Afioga Mamalu O Le Ao o le Malo, a o lau tuualalo sei tuu atu pea i le Komiti sei toe saili ni finagalo, aemaise la o lea ua ou matamata atu ma ou tilotilo atu i tagata la ia o le a lesitala i Nofoa ia o urban seats ia, o le matua tele lava o nuu ma alaafaga ia e aafia ai. A o le fesili la, e ono aafia foi ia itumalo ia o Vaimauga Sisifo, Vaimauga Sasae, Faleata Sisifo ma Faleata Sasae i le taimi nei o latou tagata palota, aua o lea o le a lesitala tagata fou i free holds. E tele lava le aafiaga ma ou te iloa foi, e le faigofie ma e taugata foi. O le uiga la o sau faamatalaga lau Afioga, ona o se avanoa sei toe

tuu mai ai i itumalo ia e aafia i le tulaga ia. Ma e le faigofie foi e talitonu foi le matou au palota, o le a le mea o le a sui ai? O la lava ua i ai fuafuaga a alu lava ua leai ai se numera po o se aofaiga e mafai ai ona avea ma se itumalo palota, ia ona faamuta lava lea e le toe i ai se Nofoa o le Palota Taitoatasi. A o lea ua faatino ae lei tau lea faamoemoe, ia o le tala lava foi lele, 'e fasia lava le gata a o la e pulapula mai mata.' E pei o le tulaga lena lau Afioga i le Fofoga Fetalai. O le faanoanoaga la lena, o le natinati o le Tulafono Tau Faaofi ae tele le aafiaga i le matou Nofoa palota.

Lau Afioga, o lea foi la ua saunoa mai le Minisita i le Faavae. O lau fesili la; a pasia nei la le tatou Tulafono Tau Faaofi lea ae toe tagai atu i le Faavae ae aumai la le Faavae e teuteu ona o le mea lea ae le pasia, o lona uiga e toe agai foi i tua. O lea la ou te fia malamalama ai i le tulaga lea, aua a pasia nei le Tulafono Tau Faaofi ae aumai le Faavae e teuteu ae le pasia, o le tulaga lena o lea e popole atu ai. Ae o lau tuualalo, pe mafai lava se avanoa e toe tuu atu ai le Tulafono Tau Faaofi....

Afioga Hon Palusalue Faapo II: Lau Afioga i le Fofoga Fetalai, e faamalulu atu i le sui usufono.... E leai se agaga... O se mea e fia faamalamalama.

FOFOGA FETALAI: Ou te lei tuuina atu le avanoa Palusalue. Alaala i lalo. Tulai mai se tasi o sui usufono mo le Au Palota Taitoatasi e faaauau le saunoaga.

Susuga Hon PAPALIITELE NIKO LEE HANG: A solifono soo tuli i fafo. Lau Afioga i le Fofoga Fetalai, e pei o se faamatalaga lena ona o le tulaga la lea. A faapea la e oo foi i le taimi e aumai ai le Faavae e teuteu ona o le tulaga lea o le Tulafono Tau Faaofi lea, o nai aafiaga ia e popole ai po o le a la le tulaga e i ai. Ma o le mea moni lava, ou te le talia le Tulafono Tau Faaofi lena. Ma lou faaaloalo lava.

Afioga Hon Palusalue Faapo II: O le mea tonu lava lea ou te fia tulai atu ai lau Afioga i le Fofoga Fetalai mo sina avanoa.

FOFOGA FETALAI: Tulai maia. Sei vagana ua ou faatagaina oe ona e tulai mai lea. Ia o lea la ua ou faatagaina oe. Tulai mai le Taitai o le Itu Agai.

Afioga Hon Palusalue Faapo II: Faafetai mo le avanoa. Na o lau fesili lava i le sui usufono lea faatoa faamaui atu nei, leaga o ia e aafia i le mea lea, o laua uma. Po o le a se la faauigaina o lea mea o lena e te lua saofafai i ina i le HRPP ae o lea o le a soloia o oulua nofoa? O le a sau faauigaina o lea mea lau Afioga i le sui usufono mo le Au Palota Taitoatasi? Na pau lea o le fesili.

FOFOGA FETALAI: Ia, o lea la ua maua le au taufaosooso.

Susuga Hon Papaliitele Niko Lee Hang: Lau Afioga i le Fofoga Fetalai, e puupuu lava...

FOFOGA FETALAI: Ia, sei tulai ai le Palemia sei....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea la ua uma le saunoaga faalauaitetele a le Taitai o le Itu Agai?

FOFOGA FETALAI: O si ana tafutafuafi lava o le taeao, o le faaoloataua. Tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang sei tali le faaoloataua lea.

Susuga Hon Papaliitele Niko Lee Hang: Faafetai lava i lau Afioga i le Fofoga Fetalai. E puupuu lava le tali, o le fasia o le gata a o la e pulapula mai ona mata. Faafetai.

FOFOGA FETALAI: Malo. Ia o le a sooula tuleiga ma saunoa o lenei taeao i le sui usufono mo Samoa Aoa.

Tulai mai se tasi o sui usufono mo le Au Palota Taitoatasi, Afioga Maualaivao Pat Ah Him.

Afioga MAUALAIVAO PAT AH HIM (Palota Taitoatasi): Faafetai i lau Afioga i le Fofoga Fetalai mo le avanoa. Ia taoto pea ia le paia ma le mamalu ma le toafimalie o le Maota, ma ou te talitonu foi o lenei taeao sa ta sau fiafia lava ma e ese le mea sa ta tapena mai ai, ae ua tei ua faateia ua matou vaai atu, ae... e fai lava le misa nei i le taeao ae o lea ou te taumafai e faitau sei tau catch up po o le a le mea lea e tau... ae ui i lea, o lea ua tau vaai atu i le ataata mai o le mataupu i lenei taeao.

Lau Afioga i le Fofoga Fetalai, faafetai ua ma sooula ma le uso vaeatu ona paia. I lenei mataupu, e moni, ae sa ou lipoti i le Komisi o Faiga Palota sa iloiloaina, sa ou vaai i ai, sa ave le fautuaga, sa ave lagona, ae sa ou matamata atu, ua uma ona pasia i le Paeaiga i ona tua atu, lea na faamuta i le 2010. Sa ou sau foi iinei i le Maota ua ou matai, o le laasaga mulimuli lea sa faaleleia atili ai lenei itumalo Palota Taitoatasi po o tagata, ou te le iloa tele faauiga. Ae o lau vaai i ai i tuua ma tamalii o lo o i totonu o le itumalo lea, sa amata mai i le amataga e peiseai sa faaputupu ai i i, sa tuu ai i le vaega lea, e le i ai ni faasinomaga po o... o le a ou le tautala tele i ai, ona sa amanaia lava i latou nei i lalo o le Faavae. Ae sa ou sau foi sa fai lau lauga lea e tau o le lauga faataupou, le paia o le Maota ma Samoa, o le taimi nei ua le o toe i ai se saina po o se tagata uli tulou, po o se afakasi, ua tasi Samoa. A o lou itumalo foi, o Samoa Aoa, aua e sau lava mai Saua seia paia Analega, e sau mai Aleipata seia paia Falealupo, Upolu ma Savaii. Ae ua ou faapea, o lea la ua manaia. Sa ou faia foi faalupega o lou itumalo, na ou nofo lava au ma... o Samoa atoa. A o le taeao lenei, e ese le mea ua ou vaai i ai, ua ou tei, e le o se tamai tei, o le matua tei lava. O i matou i le Itu lenei, o matou o lo o taitaia le Malo, ae peiseai e ala ona ou tei, sa ou faapea ai matou te taumusumusu i le mea lea, ae ua ou tei ona o le iuga lava a le Kapeneta, ae o matou nei mea e tau o back benchers, e le iloa le mea lea e tupu. Ioe.

Ae ui i lea, ou te talitonu i le agaga o lenei taeao, manaia lau faalogologo i le faamalamalamaina e le Minisita ua le o toe lua ni tagata, ua tasi tagata, o Samoa uma. O lona uiga la, i le Palota Taitoatasi i le itumalo lea, sa lua ituaiga tagata, o Samoa atoa ma Samoa le atoa, ae o le mea lea ou te lagona, ou te fiafia i le mea lea, tasi Samoa. Manaia le faamalamalamaga aua e umi lava le taimi...

FOFOGA FETALAI: Malie le sui usufono mo Samoa Aoa se tulai mai le Minisita i se mea e fia faasao.

Afioga Hon Fiamē Naomi Mataafa: Lau Afioga i le Fofoga Fetalai, o se mea e fia faasao. E popole lou taofi i le saunoaga a le sui usufono faapea sa i ai le faavasegaina o Samoa atoa ma le Samoa le atoatoa. E leai e le o le agaga lena, sa manino lava le faamatalaina o agavaa o e sa i le lola lautele ma le lola mo le Au Palota Taitoatasi, ae sa leai se faavasegaina e faapea o le isi ua i ai le atoatoa, a o le isi ua leai se atoatoa. E eseese agavaa lau Afioga.

FOFOGA FETALAI: Ia, tulai mai le sui usufono mamalu. Malie le sui usufono sei tuu atu le avanoa i le Taitai o le Itu Agai. O le a se mea Palusalua?

Afioga Hon Palusalua Faapo II: Lau Afioga i le Fofoga Fetalai, ioe, o lata fesili foi e fia malamalama. Talofa e i si sui usufono e tusa ai ma lana saunoaga. Po o le a sana fuafua o le Vaega Faaupufai e Puipuia Aia Tatau a Tagata, a o lea o le a aveese lau aiatatau. Ioe, e tatau ona amata mai i ina le aiatatau lea, a o lea ua aveesea. E le gata i lau Afioga, a o tagata Palota Taitoatasi.

FOFOGA FETALAI: Ia, e le o i ai foi Tuivalea i le sui usufono mamalu o lo o saunoa. Ae tulai mai pea le sui usufono mamalu, o lea o le a oo i le tulaga tonu lea o le faamaninoga o lona finagalo. Tulai mai se tasi o sui usufono mo le Au Palota Taitoatasi, Afioga Maualaivao Pat Ah Him.

Afioga MAUALAIVAO PAT AH HIM: Faafetai. Ou te faamalulu atu i le Afioga i le Minisita. E le o se agaga e tau faaese ae ou te talitonu a i ai lava le taimi e faaletonu ai le upu, e pei ua le maua le agaga e faamalalamalama ai le mataupu. A o le saunoaga a le Afioga i le Minisita, manaia le faamalalamalama. E taua foi ia te au, ae ona o le tulaga faanatinati ou te talitonu ai e ao ona outou silasila totoa i ai sei tatou toe matamata ma faitau lelei le Tulafono Tau Faaofi. Ou te talitonu o lea ua manino mai sui tauva pei e lelei foi lea faiga pe le lelei o le faamaonia mai e se tamaitai po o se alii loia, ae o le taugata foi latou ia. Mo le faafesili a le Afioga i le Taitai o le Itu Agai, sei avatu lava le mea nei tei ua galo ia te au leaga o lea e te tuitui mai pea, malie lou finagalo, lafo mai pea sei taumafai atu le ma pitolaau. E iu ina sese ai ma aafia ai ona o lou taufaaosooso mai o le mea lea. O lea ua uma ona tali atu le Susuga i le Papalii, o lau tali foi lena. E leaga le mea o le gata e fasia ae pupula. A i ai se upu e sili atu i lea, ou te taumafai e avatu, a o le taimi lenei, o lagona na.

I le Tulafono Tau Faaofi lenei o Faiga Palota, o lea ua aumai tailo pe toe aumai ma itumalo, ua le o toe au... o nisi sa palota mai Savaii ma nuu mamao, talofa e, ua le o toe... Vagana la o iinei i Apia i nofoaga tulalata mai i le taulaga, o lea ua fai i ai itumalo nei. Ma ou te talitonu e i ai foi le lagona ua feteenai ma nisi o sui o alaalfaga nei i Vaimauga Sasae, faapena foi ma Faleata Sisifo ma Sasae. E ao ona faamanino lelei pe faapefea le faatulagaina o tagata palota, ioe, i le tulaga i elelele tumaoti faapena foi elelele tumaoti, aemaise ai o le lola lea o le Au Palota Taitoatasi lea ua saunoa le Afioga i le Minisita e le o toe i ai se lola lea o le Palota Taitoatasi. Pe le mafai ona

faaaoaga pea latou nei o lo o i totonu o le lola lea ae o lo o nofoia ni nuu ma afioaga o lo o aafia i totonu o nei itumalo fou o le a avatu i ai sui nei o le Palota Taitoatasi. Ma le faaaloalo, ou te le... Ou te lagona foi, ou te le lagolagoina le Tulafono Tau Faaofi lenei ona e faateia au i lenei taeao, ae sei toa lelei foi le moa vaeatu le paia o le Maota ona toe maua foi lea o se manatu. A o lenei taimi, na ona matou faaataata atu, o se Tulafono Tau Faaofi e faateia ai lou nei tagata i lenei taeao. Ia manuia le tatou Fono.

FOFOGA FETALAI: Malo. O le a sooula ma se tasi o sui usufono mo Falealili, Tofa Tusa Misi Tupuola ona avatu ai lea o le avanoa i le sui usufono mo Alataua Sisifo.

Ia, tulai mai le sui usufono mamalu e saunoa.

Tofa TUSA MISI TUPUOLA (Falealili): Faafetai atu i lau Afioga i le Fofoga Fetalai mo le avanoa foi o lenei sui usufono, le mamalu o le Palemene i lau Afioga i le Palemia ma le mamalu o lau Kapeneta, le Taitai o le Itu Agai ma lona Sui Taitai, aemaise foi o le la Itu o le tatou Maota Fono.

Ou te tulai atu ma lou ava tele e fia fai foi se sao o lou sui usufono i le tatou Tulafono Tau Faaofi e pei ona faataoto nei i totonu o le Palemene o Samoa. Lau Afioga ma le faaaloalo tele ou te muamua ona ou faafetai atu i lau Afioga i le Tamaitai Minisita i lenei Tulafono Tau Faaofi taua, aemaise foi o le toe teuteuina o lenei Tulafono o Faiga Palota, ina ia maua pea le saogalemua ma se lelei mo le lumanai o le tatou atunuu i nei mea o Faiga Palota.

Sa i ai le manatu o lenei sui usufono o le a maua sina faamalamalama a o lei oo mai le mataupu i le Maota nei. E tele taimi sa ou tau saili lava le Lipoti a le Komisi, peitai ane e lei maua lava se mea e maua ai se iloa ma se malamalama aemaise lava nei mea o suiga o tatou Tulafono lau Afioga. E ui i lea, o lea o lo o faafofoga mai lou itumalo Falealili, o lea foi ua amata ona ou tau avatu se manatu e ui lava ina e lei maua tele se lagona ma se finagalo o le tatou itumalo, ae ua ou manatu o le a faia pea se manatu o lo outou atalii e tusa o lenei teuteuga, aemaise o aafiaga ua aafia ai lo tatou itumalo o Falealili.

Lau Afioga ma le mamalu o le Palemene, ou te fia tautala muamua lava i le Vaega 13 o le Tulafono Tau Faaofi i lona (2)A, o lena o lo o faamaioio mai ai e le Tulafono Tau Faaofi itumalo ma le aofaiga o afioaga i totonu o lea itumalo faapalaota ma lea itumalo faapalota. O le a le afea la i sou lagona isi itumalo e pei ona i ai, a o le a ou tautala sao lava i lou itumalo o Falealili. E faamalulu atu foi i lau Afioga i le Minisita, Tofa Hon Tuiloma Lameko pe afai foi o le a sau faafofoga mai pe a sopouta se faamatalaga. E leai, o le agaga lava ia o lou sui usufono na ona fia faamalamalama le mea o lo o ou lagona, ae ou te manatu o lea ua maea ona e silafia le tulaga ua i ai le vaevaeina o lo tatou itumalo.

Lau Afioga i le Fofoga Fetalai ma le faaaloalo, e ioe le itumalo i le Tulafono Tau Faaofi i le Teuteuga, a o le vaevaeina o le itumalo, o le mea e aupito sili la lea ona taua i sou manatu. A silasila i ai i le Tulafono Tau Faaofi lena ua aumai, ua i ai afioaga mavae ua le o aumaia i lalo o le Tulafono Tau Faaofi lea e pei o Piu ma Matavai. Ua le iloa la e lou sui usufono po o fea o ave i ai afioaga ia, a o afioaga mavae o le itumalo o Falealili. O le ala lea sa ou taumafai ai pea i le amataga ma o lau lea faamatalaga ua ou le malamalama aua afai o faafofoga mai lou itumalo i le taeao lenei, o lena o lo o i ai afioaga

o Piu ma Matavai i totonu o le lisi. Talofa e i nai nei afioaga i o latou paia ma o latou mamalu lea ua ou le malamalama i ai pe aisea le mea ua ala ai ona le tuuina i totonu.

Lau Afioga i le Fofoga Fetalai ma lou faaaloalo lava, o le tulaga o i ai lo matou itumalo i le aotelega o finagalo faaalua o tagata palota o le itumalo, e le o i ai lava se agaga e vaelua faapea le itumalo o Aiga Sa-Fenuuivao ma Alo o Fanene, aua a silasila le Maota ma lau Afioga i le Fofoga Fetalai i le tulaga o i ai Alo o Fanene i le tuufaatasiga o afioaga, e sefulu afioaga. O Aiga Sa-Fenuuivao, o le aofaiga o afioaga na o le fa. A tuu foi la i le faitau aofai o palota a Aiga Sa-Fenuuivao i le fa afioaga ia mai Salesatele seia paia Sapoe, na o le 1,804, ae a silasila i le faitau aofai o tagata palota i Alo o Fanene i le sefulu afioaga, e 3,571 tagata. O fea o i ai le amiotonu o le vaeveaga? E leai se amiotonu, ona pau le mea o le a tulai mai ai nei lau Afioga i le Fofoga Fetalai ma le mamalu o le Palemene, e iu ina aafia ai faavae ma pulega mamalu a le itumalo aua na o le tolu upu o faalupega o lenei itumalo, “Alaalagafa ma la oulua Nofu ma Falealili.” Ae a silasila i ai i le tulaga o i ai, a vaelua tutusa Falealili e 14 nuu, ona maua ai lea o se amiotonu sao lava o lenei Tulafono Tau Faaofi e 2,690 tagata palota o le isi Falefitu, 2,685 tagata palota o le isi Falefitu ma o le amiotonu lea a le Atua. A o upu o lenei vaiaso o lea lava na faalogologo pea i le Afaigaluega Paia a le Atua lea lava o lo o latou taulagi lenei vaiaso ma le la vaiaso ua tuana, ona o le vaiaso o lo tatou alo atu i puapuaga o lo tatou Alii, o lo o faapea mai se latou mau, “O le matau i le Atua, o le amataga lea o Pulega lelei.” E leai se pulega lelei lau Afioga i le Fofoga Fetalai o tulai mai i nei i lenei itumalo, e leai se matau i le Atua. Ia se i vaai i le leai o se matau i le Atua ma le aveese o afioaga taua i totonu o lenei itumalo? O le itumalo e aupito sili lenei ona tele nuu ma tele afioaga, a o lea e pei e le o matua ano lelei i ai le Tulafono Tau Faaofi. Talofa e i si ou itumalo e pele, a o lenei e pei ua soona fai e le Tulafono. E ui i lea, Falealili, ia to’a pea le tai. O le a lava le finagalo o le Malo ma le tulaga o i ai lenei Tulafono i lona vaeveaina mai Sapunaoa seia tau i Saleilua i le isi itu, Utulaelae seia tau mai i Siuniu i le isi itu, o le tulaga lena ua i ai nei le Tulafono.

Ona pau lava le agaga lau Afioga i le Fofoga Fetalai ma le mamalu o lenei Palemene, se o ita ta te le manao i se mea mo ita nei, ae ou te manatu i le lumanai o alo ma fanau a le itumalo o lo o taumafai mai i le Maota lenei. O au ia e uma taeao ou te le iloa pe ou te toe sau i le la Paeaiga pe leai, ae ou te manatu i se mea lelei ina ia soifua ma ola mai alo ma fanau a le itumalo o la o lo o latou iloa lelei lo latou faasinomaga ma le auala e oo mai ai i totonu o le Palemene.

Ou te manatu o isi tulaga uma e pei ona aumai i totonu o le Tulafono Tau Faaofi lau Afioga i le Fofoga Fetalai ma le mamalu o le Palemene, o lena ua matou fai atu. E lagolagoina e le itumalo le Tulafono Tau Faaofi i le suiga po o le Toe Teuteuina o le Tulafono, ae tumau pea lou tetee agai i le vaeveaina o lou itumalo e pei ona faia nei aemaise o nai afioaga na o lo o misi i totonu e pei o Piu ma Matavai.

Ma lou faaaloalo tele lau Afioga i le Fofoga Fetalai, ona pau ia o nai manatu pupuu e tuuina atu i luma o le Palemene aemaise foi o le Afioga i le Minisita e ou le Tulafono Tau Faaofi, se i toe silasila totoa ane i ai po o le a tonu le tulaga e maua ai se lumanai manuia o lenei lava mea o le palota aua o mea a

papalagi, a o le a aafia ai pulega mamalu, faavae ma tulaga mamalu o lou itumalo o Falealili.

Falealili, ia manuia la outou faafofoga mai. O le a foi sa outou faafofoga mai i lo outou atalii, ia malu ave a i fale ma ia faamagalo mai le auauna ma le faaloalo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Malo saunoa i le sui usufono mamalu, ae tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ou te fia fesili atu lava i le sui usufono sa saunoa nei ona o lea e vaevae lelei mai le iuga o lona finagalo i le tulaga i nuu mavae ma le itu o le tau faatutusa ina ia faatutusa. O lea ou te tau matau atu o lea e tau agai lona finagalo i nuu mavae, a o lea foi ua uma ona aumai lona finagalo i le tau faatutusa o tagata palota. E pei o le itu lena o lea e fetotoai ia te au, a o lea ua ou matauina e faatau e ia le vaevaega ina ia tau faatutusa, o le mea lena e taua.

FOFOGA FETALAI: E manatu ona o lea ua tatou taunuu i lo tatou taimi malolo, o le a tuu atu le avanoa lau Afioga i le sui usufono mamalu e toe faamanino mai lou finagalo e ala i mea ia e lua o lo o fesiligia e le Taitai o le Malo.

Mo le silafia e lo tatou Maota ia i latou o lo o fia saunoa, o le agaga moni lena o le tatou felafolafoaiga lea e fai, e aumai avatū aano moni o tuleiga ma saunoaga a outou tonu po o sui usufono mamalu o lo o aafia i le Tulafono Tau Faaofi lena, ma o lo o matauina ma le totoa e le Malo. O le ala lea o le tutulai atu ma fesili atu ina ia aumai outou finagalo aua o lea lava e maua le avanoa ina ia mafai ona fetuunai ai ma faamanino ae tatou te le i oo i le loloto i le pasia o le Tulafono.

E ui i lea ua tatou taunuu i lo tatou taimi malolo, o lea ou te faasilasila atu ai o le a faataatiaese Taualumaga a le Fono Aoa mo lana malologa masani o le taeo.

Na faataatia ese Taualumaga a le Fono Aoa mo lana malologa masani i le itula e 10:45 ma toe faaauau i le itula e 11:20 i le taeo.

FOFOGA FETALAI: Ua faamalo atu i lena vaega o le aso ona o lea ua tatou taunuu i le vaega lona lua o a tatou galuega, ae i ai le talitonuga ua faafoisia ma faapoopoina le soifua maloloina lelei aemaise o lo outou malosi le paia ma le mamalu o le Maota mai le malologa na mavae atu nei. E fiala lava i le vaavaai atu o lo o sologa lelei mea uma aua le taliga o le sua, ae ua maua foi se faaso lelei i le taimi o la tatou malologa ina ia maua ai le tulaga o le faafoisia o le malosi aua lava le toe faaauaina o a tatou galuega. E momoli atu ai le faafetai tele le onosai mai i le paia tele o lo tatou Maota i lau Afioga i le Taitai o le Malo ma lau Kapeneta, aemaise foi lea tala-na-atoa i le

Afioga i le Taitai o le Itu Agai aemaise o sui usufono mamalu uma o le Maota Fono.

E faia le malologa ua faaiuiu le tali a se tasi o sui usufono mo Falealili, Afioga Tusa Misi Tupuola. Tulai mai le sui usufono mamalu e faaiu mai le saunoaga ma tali mai e ala i le fesili a le Afioga i le Palemia e pei ona sa tuuina atu.

Tulai mai le sui usufono mamalu.

Tofa TUSA MISI TUPUOLA: Faafetai i lau Afioga i le Fofoga Fetalai. Ua maea foi ona palegaauau le taliga o le sua i lau Afioga i le Taitai o le Malo, le Kapeneta ma le Palemene aua foi se faasiliga malosi aua feau o totoe o lenei aso.

Ua ou tulai atu lau Afioga i le Fofoga Fetalai e faaauau se tamai manatu e pei ona tuuina atu e tusa ai ma le Tulafono Tau Faaofi taua e pei ona i luma nei o le Palemene.

Lau Afioga i le Fofoga Fetalai, faafetai i le faauilavea a le Afioga i le Taitai o le Malo e tusa o le mataupu e pei ona tuuina atu e lenei itumalo o Falealili. E moni lelei lava le faauilavea a le Afioga i le Palemia ma o le agaga foi lena o le itumalo ina ia tusa ai ma fuafuaga ma le aofaiga. Ia silafia foi e lau Afioga i le Fofoga Fetalai ma le mamalu o le Palemene, o le Tusi Faalupega lava ia a le atunuu o lo o i ai Saga. O Saga a faauigaina i le faa-Falealili e fitu nuu. O lona uiga la i le amata mai Saleilua seia oo mai i Malaemalu e fitu afioaga. Ona faagasolo loa lea o le isi itu seia oo mai i le aso. O lena foi e i ai le pese e masani ona faafofoga i ai le Palemene, “Falefitu e, Falealili ma Aleipata.” O le pese lava lena e masani ona pepese ai tupulaga mai lava i na onapo seia oo mai i le aso nei o lo o ola pea.

O le agaga la lea ou te tulai atu ai lau Afioga i le Fofoga Fetalai ma le faaaloalo, e fia momoli atu le faafetai e ui lava ina lagona le faanoanoa ona o le faaiuga na fai e lenei Komisi, ae sa tataua ona fesiligia pea matou o sui usufono se i fesili i nai o matou itumalo ina ia aumai ni o latou finagalo, a o lea ua aumai le latou faaiuga ma faaauau loa a tatou fuafuaga, a o lena ua matou fai atu lau Afioga i le Fofoga Fetalai, e lagolagoina e le itumalo le Teuteuga o le Tulafono Tau Faaofi mo Faiga Palota 2014, ae vagana le talosaga lena lau Afioga i le Minisita ma le mamalu o le Palemene aemaise o le Kapeneta, se i toe silasila ane i le vaelua tutusaina o lo matou itumalo e tai fitu nuu i le itu, ona taua ai loa lea o le isi itu o Falealili Sasae ae tau le isi itu o Falealili Sisifo leaga o lea e le o aumaia i lalo o le Tulafono Tau Faaofi le faaigoaina o itumalo nei, ae tumau pea faavae ma mamalu o lenei itumalo e le sua e oo lava i le faavavau.

Ia manuia le Fono, faafetai.

FOFOGA FETALAI: Malo faafetai saunoa i se tasi o sui usufono mo Falealili, Afioga Tusa Misi Tupuola.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ua ou malamalama i le finagalo o le sui usufono. Na o le pau lava se vaega lea, o le faipese lea na faia le pese lea e le malamalama i upu o Atua. E sao le pese, “Falefitu, Falealili ma Aleipata.” E le malamalama o lea e i ai itumalo lea e i ai i totonu i ina e le o

taua e pei o Lotofaga ma Lepa. Ona pau lava lena o le mea lea na ou tulai atu ai aua e le taumate lava, o se Falealili lea na ia faasese le pese.

FOFOGA FETALAI: Malo, e manatu ua malamalama le saunoaga ma le finagalo o le Afioga i le Palemia.

Tulai mai le sui usufono mamalu mo Alataua Sisifo.

Afioga LAFATELE PATRICK LEIATAUALESIA (Alataua Sisifo): Lau Afioga i le Fofoga Fetalai, ou te tulai atu foi ma le faaaloalo i lenei vaega o le aso e tau molimoli se sao o lenei usugafono i lenei Tulafono Tau Faaofi taua ua taoto mai i lumamea.

Lau Afioga i le Fofoga Fetalai faapea le maualuga o lenei Maota, e i ai nisi o vaega o le Teuteuga o le Tulafono Tau Faaofi lenei ou te lagolagoina, ae i ai foi nisi vaega ou te le lagolagoina. O le vaega lea na saunoa i ai le Tamaitai Minisita e ana le Tulafono Tau Faaofi i tulaga i Pulenuu, faafetai lava ua tefa le tauala ma toe silasila totoa i vaega. A silasila i le taimi na faaogaga ai le tofiga pulenuu i faiga palota ia ua uma atu, o se vaega sa o nisi pulenuu sa fai i luga o ni auala le amiotonu. Ae faafetai ua silasila mamao lau Afioga i le Minisita faapea foi le Komisi, lea ua maitau atu ua suia mai ia le vaega lea i alii ma tamaitai loa. O le itumalo lenei, sa i ai foi se faafitauli lava i le matou foi pulenuu, e le na ma le laina, ua taoto i le agatonu le tofi o le itumalo e leai se palota. Ae talu ai masalo o la e afio mai le Taitai o le Itu Agai, o le aualii lava ia na ala ai ona fai lau palota, ae po o ua o faaoso le pulenuu ia ona saina lea o le pulenuu i le form a le isi foi tulafale sa ma tauva i luga o faiga e le amiotonu, aua foi e toatasi lava le tagata lea ua alu i ai le paoa. Ae faafetai o lea ua maitau atu ua suia vaega ia, e mafai ai ona aveese lea vaega e le talafeagai, aua a loto lava le pulenuu e ita i le sui tauva, ia ua sau foi fai ia faamatalaga pepelo ma faamatalaga le amiotonu.

O le isi vaega lea o o'o. Ia lau Afioga i le Minisita ma ē e ona le Tulafono, ia na ona matou fesili i le autafa lea aua o lea e le o po malae, o lea foi e manino tulaga o tatou o'o, ia faatoa fai lava pe a faapea foi e maea le palota, o la e faafofoga mai itumalo taitasi. Ia e i ai isi itumalo o le itumalo lenei, a maea loa le faiga filifiliga a le atunuu ma uma lou taimi....

FOFOGA FETALAI: Malie le sui usufono o lo o saunoa, sei tuu atu le avanoa i le saunoaga a le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Faafetai i lau Afioga i le Fofoga Fetalai. O le tulai atu ma le agaga faaaloalo, ua manaia foi le tuuina atu o le sa o le Afioga i le sui usufono, ae pau lava o sina mea e fia faasao, o le fetuunaiga lea ua i ai nei pei ona faaogaina ai mea o faamatalaga tauto e faia i luma o se loa mo ni tagata foi lea e fia faamaonia ia le afioaga po o le itumalo e palota ai ia po o se fesuiaiga foi po o transfer, e lei faia ona o se tulaga faapea ua piopio ia sui o nuu, leai. O le tulaga lava ia na sau ai, ia o sui lava o nuu po o pulenuu sa latou faia le matafaioi lea. Peitai la, atonu ua silasila le Malo i le tulaga foi lea ina ia saga faaleleia pea lea foi vaega o le auaunaga e ala i le lesitalaina o sui fou ma le fesuiaiga o i latou mai lea itumalo i lea itumalo ona o sootaga faa-Matai ia ma tulaga faapena o le nofomau i se taimi umi lava talu ona soifua mai, ia pei o le tulaga lena, lea e

ave ai le faataua ia faaoga ia lea foi faiga ia mea o affidavit foi lea ina ia saga uunai ai foi ia tagata aua le avea ni faamatalaga sese i lea vaega o galuega faa-faiga palota. Ae ou te le lagolagoina le saunoaga a le sui usufono faapea ua piopio le faiga o tofi ma tiute o pulenuu, leai, o i latou nei o filifiliga a le Malo e mafua ai ona tulai i le tauaveina. Ma e silafia foi o le vaega aupito sili lea ona malosi o faigamalo, o le Law and Justice Sector e aofia ai ia le vaega lea o le Tulafono o Faamasinoga, e aofia ai foi la pulega o alii ma faipule po o faa-Lotoifale i totonu o afioaga ma alaafaga. Aua a aunoa ma le pule a alii ma faipule e aofia ai ma le pulenuu, e le malu se mea – ma o le lagolago malosi foi lena i tiute faale-Malo, faa-Leoleo o tulaga o le Faamasinoga, o alii ma faipule o afioaga, e afua ai ona filifiliga pulenuu latou te galulue faatasi e fai ma sui o nuu aua la ia tulaga ia sa sau ai ia tulaga o le faamauiina o i latou e fia palota i fea le afioaga o i ai ae faapea foi le tupuaga e afua mai i matua, ia po o le tulaga foi o le nofomau. O le mea la lea ou te le lagolagoina le finagalo o le sui usufono, alaala i lalo o lea ou te tautala faamolemole. Ia o le mea lena, e le tataua ona saunoa faapea le sui usufono leaga e aafia ai tofi ua uma ona filifiliga ma faamaonia e le Kapeneta e faia le auaunaga lea, a o lea ua toe teuteu i lalo o le Tulafono fou lena, ia ou te talitonu, e taua tele, o le ala foi lena o le lagolagoina o lea vaega o fesuaiga o le a i ai ia faiga palota. Ma lou faaloalo.

FOFOGA FETALAI: Malo, faafetai saunoa i lau Afioga i le Minisita o lo o puipuia tulaga tau pulenuu o le tatou atunuu. O le ala foi lea o lou tuuama ma taumafai e tuu pea le finagalo, leaga o lo o tulai mai le sui usufono e faaali lona le malie i le Taitai o le Itu Agai. O le agaga moni lena sei faamatalatala mai, po o le a tonu le mea e ala ai ona atugalua i pulenuu. O lona uiga, o le Taitai o le Itu Agai lea e sau i ai lana tuuaiga. E ui o lea, lau Afioga i le sui usufono mamalu, ia e talii foi ae popoe leaga ne i te i ua selefutia nisi o pulenuu, ia ae le aafia ai ona o nisi faamatalaga.

Afioga LAFATELE PATRICK LEIATAUALES: Faafetai. Lau Afioga i le Fofoga Fetalai, o lea lava e manino sa matou faamatalaga, sa ou faapea e faalogologo lelei le Minisita, o lea lava e manino le matou tala na fai atu, e le safea fua le maaveave le fua, e le o agai sa matou tala i le atunuu ma pulenuu, o lea lava e agai lau faataitaiga agai i le pulenuu o lena nuu, o lea sa taua ai le Taitai o le Itu Agai, o lau tala lena. Ou te le faavalevlea e tau fai foi si loa i le aganuu.

FOFOGA FETALAI: Ua uma la lau.....

Afioga LAFATELE PATRICK LEIATAUALES: Lau Afioga i le Fofoga Fetalai, o le agaga lena o lea sa tau avatu ai ia sa matou tala i le taimi ua sola ma futia ua alu i le manaia o le faamoemoe lea. O le tulaga foi pei ona ou taua i o'o ma tulaga faapena, ia e i ai isi itumalo a maea loa le faaiuga o Paeaiga taitasi, ia ona faapea foi lea ona agai i itumalo. E le na ma le laina e manino lelei le faafofoga a lo tatou atunuu faapea foi sui usufono mamalu o le tatou Palemene lena, e le faapea e feiloai atu i le itumalo ma tau molimoli atu le tofi o le itumalo, ia ae faaoga upu e fai ai ona o le tulaga o le Tulafono lena o lea ua tapu mea uma, ona o le manumanu foi i tulaga tau faatosina.

O le matou tatalo i lau Afioga i le Tamaitai Minisita faapea foi le Komisi sa lauliliuina le vaega lea, sei toe silasila totoa lava, pei lava ona ou fai atu, e le faigofie lo tatou atunuu, o Samoa o le atunuu tofi, e talatau Toga, ia ae tala tofi le atunuu lenei. O tulaga ia o lea e popoe i ai sa matou taofi i faaiuga foi o Paeaiga ma tulaga taitasi, ia ona faapea foi lea ona agai i itumalo, ia aua e tau molimoli e le o se tofi o tatou, molimoli le tofi o le itumalo ia ma fai atu foi sa matou tala e faafetaia ai foi le faaaloalo ma le tulaga faapena, ia pei ona tatou seei mai ai i lea Paeaiga i lea Paeaiga, ia o i ina lea e avatu ai sa matou faafesili i le vaega lea, aua o au ia e le mafai ona ou tautala gugu ia pe a faapea foi e feiloai ma aiga ma Samoaleoi ma lenei nuu, ia e tatau lava ona tau molimoli ia se seleni aua foi ia tulaga o le alii taeao ma le usu faaaloalo a le nuu. A o nisi vaega o le Teuteuga o le Tulafono lenei, ia o lea lava ua manaia i le matou tilotilo atu. E le agai sa matou tala i tulaga pei ona i ai ia nisi o itumalo lea e lua Nofoa, ou te talitonu o i latou ia lea e afaina i le Tulafono lenei ia ona o tulaga ua leva ona faagasolo mai ai foi a latou Faiga Palota i tulaga faapena. Ae a faapea e silasila lo tatou Malo o i e taoto lelei ai vaega ia, ia o le a le mea e tuu ai? O lea foi sa saunoa le tatou Taitai i le itula ua sola, e sau lava lea suiga mai lea taimi i lea taimi. A faapea o le suiga lelei lea e taoto ai i le agatonu le tulaga o faiga filifiliga ma itumalo o lea e tailua ia...fai, ae a faapea e le lelei le Tulafono lea e le work i i i nai sui ia e aafia i le mea lea, e le lagolago la e Lafai le Tulafono lea. Manuia le Fono.

FOFOGA FETALAI: Ia malo saunoa i le sui usufono mamalu. Na ona ou faamanatu lava tulaga o tatou Tulafono Tumau. Afai e tuuina atu e le Fofoga Fetalai se avanoa e tulai mai ai se sui usufono e faauilavea, ia ona alaala filemu lea i lalo o le sui usufono o lo o saunoa ae tuu atu le avanoa i le sui usufono o lo o ave i ai le avanoa, e faapena foi pe a oo i le taimi e saunoa atu ai le Nofoa, ia alaala fifilemu i lalo i taimi uma e fai atu ai le tautalaga ia ona faapena lea ona fetuunai le tatou Fono. O le mea lava ina faamanatu atu le tulaga ia tausia pea le malu ma le tatou nofo filemu, ia ae tuu atu lava le avanoa, e le faapea e le tuu atua, o lea lava e faasolosolo i le tulaga aloaia ia ma le tulaga ia taatia i le sagatonu le tatou galuega.

Ia ua avanoa le Maota mo se isi saunoaga, a leai o le a tuuina atu loa le fesili.

Tulai mai le Afioga i le Tamaitai tasi o Salafai, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow.

Afioga Hon GATOLOAIFAANA AMATAGA ALESANA GIDLOW: Faafetai tele i lau Afioga i le Fofoga Fetalai mo le avanoa. Ia ou te tulai atu e avatu le agaga faafetai i le Afioga i le Tamaitai Minisita mo le Tulafono Tau Faaofi taua. Ma e ia so o se suiga lava e le faigofie foi ona atoatoa sona taliaina ma se lagona i ai, ia ae e avatu pea se lagona lau Afioga i le Fofoga Fetalai aua o lo o faafogafoga mai foi le itumalo o le matou itumalo o le isi itumalo e aafia tele i le Tulafono Tau Faaofi lenei. O le faatalatalanoaga foi o lenei Tulafono lau Afioga i le Fofoga Fetalai sa faaoo foi se lagona ma se manatu i le Komisi sa latou faafoeina le faatalatalanoaina o suiga i le tatou pei ona i ai nei le tatou Tulafono. O le agaga lava lau Afioga i le Fofoga Fetalai, e ao pea ona faaleo, o le tulaga lea i le tatou vaavaai pea i tulaga e tausia ai le toafilemu ma le nofo lelei i totonu o tatou itumalo i totonu o le tatou atunuu. O le foi lena na molimoli ai se agaga tuualalo i le Komisi ina ia

tagai pea aua o le matou lava itumalo, ia e tau lava o le falelua e lua ia Iva ma Salelologa, ona e pei foi lea e galulue faatasi, a i ai se mea ua sese ai le isi vaega o le falelua, ia ua usu le isi vaega, pe puipuia ai foi ma tausia ai le nofo lelei nofo toafilemu o ona tagata. E avatu ai lava se agaga foi lea o le isi lava lena agaga taua e tatau lava ona tatou vaavaai i ai, aemaise lava i tatou o lo o fai ma taiulu i totonu o tatou...e le gata i le Malo ae faapea foi ia tatou itumalo ina aua ne i faamalepeina ni tulaga e ono afaina ai le nofo lelei o tatou tagatanuu i totonu o itumalo taitoatasi. Ia o le agaga lena lau Afioga ou te lagona e tatau pea ona avatu ai se faaleo e tusa ai ma se taumafai foi ina ia faatumauina pea le itumalo i le mea sa i ai, ina ia mafai pea ona maua le agaga lea e felagolagomai ma le nofo lelei, o se itu taua lena o le tatou siosiomaga ma le tatou tulaga foi o tu ma aga faa-Samoa.

O le isi vaega lau Afioga e fia avatu ai se manatu, o lea ua tilotilo atu ia e faamaonia e susuga i loia ia tulaga foi o e o le a faatulai mai e fia o i le tauvaga tofi. Ia o le popolega lava lau Afioga i le Fofoga Fetalai, ina ne i toe faaopoopo foi le tau a afioga i loia i luga o seleni o le a taumafai atu ai foi nai sui vaivai, ia aua foi tauvaga o le a faafeagai ai. Ae a faapea lava o le tulaga lea ua silafia e maua ai se tonu ma se mautu ma se faamaoni o galuega uma, ia e leai lava se leo na o le tuualalo atu lava ma le avatu o se fautuaga ina ia faaaogaina pea a tatou pulenuu o lo o i ai latou te silafia lelei e o lo o tautua i totonu o nuu ma le umi talu ai a latou tautua, ia ae ou te lagona foi i taimi ua tuanai, ia sa i ai foi nai tulaga i faaletonu na tulai mai, e faapena lava lo tatou soifuaga le lē atoatoa o se faatinoga o galuega tatou te faia.

Lau Afioga i le Fofoga Fetalai, o nai mataupu lava na ou te manatu sa ou manao e faaleo pea, ne i faapea ai ua taliguguina foi e sui usufono mamalu o matou itumalo o lo o aafia ia se suiga, ia ae avatu le agaga tau lava ina ia silafia ai foi lava e lo tatou Malo o popolega na sa atugalua i ai, ia ae lagona lava, ua lava foi taimi sa silasila totoa ma iloilo lenei mataupu e le Komisi sa i ai. O le faatuatuga lava ia e avatu i galuega a le tatou Malo e pei ona tofia ai e sa galulue ai. Faafetai tele mo le avanoa lau Afioga i le Fofoga Fetalai.

FOFOGA FETALAI: Malo faafetai, faafetai saunoa i le saunoaga manino i le Afioga i le Tamaitai Minisita. Tulai mai lau Afioga i le Minisita mo Tupe Maua, se tasi o sui usufono mo Falealili, Tofa Hon Tuiloma Lameko.

Tofa Hon TUILOMA LAMEKO (Falealili): Lau Afioga i le Fofoga Fetalai faapea sui usufono mamalu o le Maota Fono o le Fono Aoao Faitulafono. Ou te tulai atu foi e fia faaali se manatu e faatatau i le Lipoti. Ae ou te talitonu o le sauniga o le Tulafono aemaise foi ia fetuunaiga o le Tulafono, e le o se tulaga faigofie ma e faafetai foi i le Tamaitai Minisita ma e na au faatasi i le fausiaina o lenei Lipoti aemaise o le aiaiga o le Tulafono ua mafai ai ona faaali ni manatu i fuafuaga.

Ou te fia tautala faapitoa i le itumalo o Falealili, ou te manatu o lo o talafeagai lava le fuafuaga ua faataatia mai i le Tulafono mo le vaevaeina, aua e le o se mea faigofie i itumalo tetele nei pei o Falealili ma nisi o itumalo, e le faigofie le vaevaeina. Ae e i ai lava ia vaega e mafai ona agai i ai le vaevaega e faatatau i tu ma aganuu a Samoa. O le mea lea e pei ona taumafai mai le fuafuaga mai le Lipoti. O le mea la lea, o lea sa taua le pitonuu lea o Piu, o lea lava e sao le Lipoti o Piu o se pitonuu e lavea i lalo o Sapunaoa pei o le faamatalaga lena. O le uiga la lau Afioga ma le mamalu o le Fono Aoao

Faitulafono, i le vaai i le tulaga e i ai o lo o taumafai lava.....aua e tele foi taimi sa i ai i totonu o le talanoaina o nisi o Tulafono e aafia ai, peiseai o le vaai lava faale-maufaufau i ai i le vaevaeina o itumalo mai le amataga, pei sa agai atu lava fuafuaga a toeaia o e sa tofi o itumalo taitasi e faataua pea tatou tu ma agaifanua, ina ia mafai ai ona faigofie ona fuafua ia le tulaga i le vaevaeina o itumalo. Mo le faataitaiga, a tatou vaavaai i nisi itumalo, o nisi lava itumalo e tasi lava le nuu tasi ma le faipule, o le ata lena i lou talitonuga o le fua lava lena sa fua leaga o fua masani ona o tu ma aganuu a le tatou atunuu sa tele lava ina vaevae fuafua agai i ai, e faapena foi la i le tulaga ia Falealili, o Falealili la e taua lava o Safenuuivao ma alo o Fanene, o lona uiga o la lava e alu i le tulaga e fuafua agai i tu ma aganuu. Aua ne i avea le vaevaeina i totonu o le Maota, vaeatu lo outou tautiga i tuleiga ma saunoaga ma fetalaiga, e ono aafia ai le tulaga i itumalo, pei o lau lea vaai agai i ai, ma lau foi lena vaai i tulaga o le vaevaeina aua e le faigofie le tele o nisi o itumalo, e toatele anoanoai tagata i le isi itu ia ae toaititi i le isi itu, ona o lou talitonuga sa fuafua lava i ai. O le mea lea ou te faapuupuu atu ai se faamatalaga, faafetai atu i le Tamaitai Minisita, e lagolagoina e lou sui usufono le Lipoti ua tuuina mai mo le Tulafono. Ma le faaaloalo.

FOFOGA FETALAI: Malo, faafetai saunoa i le sui usufono mamalu. Malie o le a lafo le afi i le pito lea. Tulai mai le sui usufono mo Aleipata Itupa i Luga, ia ona toe felafuai lea i le Afioga i le sui usufono mo Sagaga le Usoga.

Tofa FAGAAIVALU KENRICK SAMU (Aleipata Itupa i Luga): Faafetai atu i lau Afioga i le Fofoga Fetalai e tusa ai foi mo le avanoa sei taumafai atu ai se sao puupuu o lenei itumalo o Aleipata Itupa i Luga e tusa ai foi o lenei Tulafono Tau Faaofi taua. O le lavelave o le Tulafono o le a le oo tele i ai se faamatalaga a lenei itumalo, aua e le o tele foi se aafiaga o i matou i suiga ia o le Tulafono o le Faiga Palota. A o se mataupu lava e momoli atu ai le faafetai tele i lau Afioga i le Minisita mo Faiga Palota, ona o le suiga lea o sē faamaoniaina ia tagata palota ma sui tauva, o lea ua pei ua faamatuu atu ai i alii ma tamaitai loia latou te faia ia le galuega lea. E momoli atu ai le faafetai tele lava i lau Afioga ma le Komisi ona o au nei foi sa i ai foi nai faafitauli sa feagai ma au a o faapena ona taumafai mai mo le nofoa foi o le itumalo i le palota laititi.

O lona lua, pei o lea ua maitauina i le Tulafono Tau Faaofi lenei ia le pa puipui ua pa puipui ai e o lo o nonofo i atunuu mamalo, o lea e pei ua manino mai i le Tulafono e agai mai e tautua mo le tolu tausaga i nuu ma itumalo, ona agavaa ai lea mo se faiga palota. A o le faafesili tele a lou nei sui usufono lau Afioga i le Minisita, po o le a se tulaga o i ai, pei o se faataitaiga o le matou nuu, matai i Lalomanu ae nofo i Apia nei po o so o se vaega lava o le atunuu, po o ua silia ma le 20 i le 30 tausaga na ona latalata lava i le taimi o faiga palota ona tau agai atu loa laia lea mo le fia tauva lava i le palota e pei o le Palota Tele lea mo le faataitaiga. Ae pei o lea e maitau i le Tulafono pei e faataua lava ia le tautua, pei o le itumalo nei foi e amanaia tele ia le tautua, e le gata lava i matai a o e o lo o faapena ona nonofo i afioaga ma itumalo. O le ala lena o lea e avatu ai le fesili lea, pe o le a se tulaga o i ai, aua o lea e pei e le o manino mai i le Tulafono, e pei na o e lava o lo o aumau i atunuu mamao lea e faamatuu mai le tolu tausaga e nonofo ai ia ma tautua i totonu o itumalo

ma afioga? O le faafesili lea e tauala atu i lau Afioga i le Minisita. Ia manuia tele lenei aso.

FOFOGA FETALAI: Malo faafetai. Tulai mai le sui usufono mamalu mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga): Faafetai i lau Afioga i le Fofoga Fetalai mo le avanoa. Ia o sina sao puupuu foi o lenei itumalo e tusa ai ma le Tulafono tau Palota ua talanoaina i totonu o le Maota.

Lau Afioga i le Fofoga Fetalai e le oo tele se matou faamatalaga i tulaga o itumalo o lo o tailua sui usufono, ona ne i sese se matou upu ona fai lea ma o matou lape i le va foi ma ia itumalo. Pau lava le mea lau Afioga e fia faaleo ai lava le... e faafua le loto ona o lau tilotilo i isi itumalo ia, e tele mamao ai le Lola o le matou itumalo o Sagaga le Usoga, ou te le iloa pe na faapefea ona oo ia nei itumalo i le tailua o sui usufono, a o Sagaga le Usoga foi ua tatau foi ona lua ni ona nofoa. A o le mea lea ou te tulai atu ai ma lou faaloalo lau Afioga i le Fofoga Fetalai, ou te fia lagolagoina le vaega 8 lea e faapea; 'Ia faamavae tagata faigaluega a le Malo pe a oo ina mana'o e avea ma sui faatu.' Lau Afioga i le Fofoga Fetalai, e tasi lea mataupu ogaoga o lo o vevesi ai pea i faiga palota ua tuanai, o lea la ua faamaoti mai e le Tulafono lenei, o ai lava e aafia i galuega e tau i le Malo po o se faatonusili po o se tagata o i totonu o le board o lo o umia se tulaga e aafia i Matagaluega a le Malo po o Matagaluega Tumaoti a le Malo, e ao ona faamavae. Faafetai i lau Afioga i le Minisita o lea ua maoti mai, e talitonu o le a le toe i ai ni finauga i le lumanai e faapea ua faaoga ia meatotino a le Malo e faaoga mo le faiga palota, o le a muta ai i i ni fetuleiaiga ma ni tuuaiga o ia ituaiga uiga sa fai i taimi ua sola, e pei e faapena se manatu sa i ai, a ua fia alu atu i le isi tulaga lea faasui tauva, ia matua faamavae maoti ae sau tatou o tatou te taaalo i le taaloga lenei o le faiga palota, e le o se taaloga faigofie. O le matou motugaafa lena lau Afioga i le Fofoga Fetalai e tuuina atu e lagolagoina ai ia le vaega lena o le Tulafono. Manuia tele le Fonotaga a le Maota i lenei aso.

FOFOGA FETALAI: Malo le onosai. Ia le sui usufono mo Faleata Sasae, sa e fia tulai mai po o.....?

Tofa AVEAU TUALA LEPALE NIKO PALAMO (Faleata Sasae): Ia pe a o i ai se avanoa.

FOFOGA FETALAI: Tulai mai le sui usufono mamalu, ona sosoo ai lea ma le sui usufono mo Satupaitea.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai, aemaise foi le Afioga i le Palemia aemaise o le Malo, le paia o le Palemene, aemaise alii ma tamaitai pule o Matagaluega ma ofisa o le Matagaluega.

Ae ua ou tulai atu e fai se manatu e uiga i le Tulafono Tau Faaofi, ona o lenei Tulafono ua aafia tele ai si ou itumalo. A silasila i le itumalo lea ua faatu, itumalo fou lea ua tau, itumalo o nuu i le taulaga i sisifo, o nuu nei o lo o aafia ai, Alafua, Lepea, Lotopa, Moamoa, Pesega, Seesee, Sinamoga,

Tuaefu, Tuanaimato, Tulaele-tai, Ululoloa, Vailoa, Vaimoso, Elise-fou, Falelauniu, Laloanea, Puipaa, Safune, Saina, Siusega, Talimatau, Tanumapua, Tapatapao, Tulaele-uta, Vaigaga, Vaitele, ma Vaiusu, o nuu uma nei o le itumalo lenei o Faleata Sisifo ma Faleata Sasae. Sa saunoa le Afioga i le Minisita e faapea mai ai o lenei Tulafono Tau Faaofi o se tasi o Tulafono ona e i ai ni tagata ese o le a omai e nonofo i totonu o itumalo nei, pe le au i ai le pule a alii ma faipule. E i ai lou mantu e eseese la talitonuga i le vaega lea, silasila le mamalu o le Palemene, o nuu nei na ou laulau atua, o le tele lava o tagata o lo o nonofo i le nuu lenei ma tagata lava o nuu nei, o lo o nonofo lava i totonu o fanua tumaoti i totonu lava o nuu nei.

Ia silafia foi le tele o nuu nei e i ai Alafua, Sinamoga, faasolo atu ai i Lotopa, Pesega, o le tele o fanua ua uma ona faatau faatumaoti, ma o tagata lava o le nuu la e nonofo ai i totonu. A tagai foi la i le lola palota a nuu nei, o le tele lava o tagata faapena. O le uiga lena o lou tulai atu i le vaega lea.

Sa i ai lou manatu, po o le a le mea ua le aumai sao ai le sui lea ia Faleata, aua o lea o le a toe vaevae Faleata ia Faleata lava ia ae tuu i ai le sui lenei, o lea ua taua o se sui soloatoa o Faleata le sui lenei, lea o le a sau ai i i, ae sau ai ma le Tulafono, e tatau ona nofo i se fanua tumaoti. Tasi la lea vaega o le Tulafono Tau Faaofi, ona o le le lava o se taimi e talanoa ai le Tulafono Tau Faaofi, e tatau ona faamalamalama.

O le uiga o le Tulafono Tau Faaofi lenei, a e nofo loa i se fanua tumaoti i totonu o le vaega tumaoti lea, ua le mafai loa la ona e toe resitala ai i le lola foi lea a Faleata Sisifo? Aua e faataitai foi lele, e tele tagata o lou aiga e nonofo, tagata Vaimoso o la e nonofo i fanua tumaoti i totonu o Vaimoso. O fea la e o i ai tagata nei? O i ai se vaega o le Tulafono Tau Faaofi e mafai ai lava ona filifili le tagata lea po o fea le vaega e alu i ai? Le vaega muamua lea, atonu...

O le vaega lona lua, o le tele ia o le faaletonu i lau tilotilo i ai i totonu lava ia o Faleata Sisifo ma Faleata Sasae. Afai foi la o lea ua aumai le sui lea e aumai i totonu, o lea e tau o le itumalo o nuu i le taulaga i sisifo. E i ai foi la lou talitonuga, so o se tagata lava e nofo i totonu o nuu nei, e lavea i pulega a itumalo nei. O se faataitaiga o le itumalo lea o Faleata Sisifo. O nuu uma lava nei, o le tele o nuu lea e i ai lea ou te tulai mai ai, o lo o i ai pulega a alii ma faipule, e pulea ai foi ma e e nonofo i fanua tumaoti nei. E tele lava le pulega a alii ma faipule e oo i tagata nei. E le faapea a e sau loa e le o oe o se tagata o le nuu ona e sau lea e nofo i le nuu lea, ona e nofo saoloto lea. E leai, e te alu i lalo o tulafono a le nuu, ma e faapena le faiga o nuu i totonu o le itumalo lenei ou te alanoa atu ai. E le mafai la ona tuueseese tagata nei.

A silasila la i ai lau Afioga i le Fofoga Fetalai i le lola lenei, o le tele o itumalo o Faiga Palota, o lea e i ai latou tagata o lea e palota atu i totonu o le itumalo lenei. Ae o le Tulafono Tau Faaofi la lenei, afai o lea ua faamatuu mai le sui lea i totonu o le itumalo o Faleata Sisifo ma Faleata Sasae, e a la pe a alu na o le tagata e matai i totonu o le itumalo lenei, na o le tagata lava e te matai i totonu o nuu e i ai Faleata Sisifo ma Faleata Sasae, na o oe e mafai ona e tamoe e mafai ona e alu e fai ma sui o le itumalo fou lea, aua e i ai lona pona. A fono la itumalo nei o Faleata Sisifo ma Faleata Sasae, o fea la le mea e alu i ai le faipule lea pe a faapea e le matai i totonu o nuu nei? O fea la le ituaiga itumalo e o i ai le vaega lenei pe a faapea e fono... A fono nei le itumalo lenei o matou, o Vaimoso, ae omai ma le mamalu o le atunuu lea e faapea o le a o i le itu lea, ou te iloa e i ai se fesetaiga i totonu o vaega

faapea. Aua e pei ona silafia, a fono lava le itumalo ma le alaafaga, e fono lava latou ia i lalo o le vaeveaga o la e palota ia latou.

O le mea la lea ua ou tulai atu ai i le isi vaega lea, sei toe tagatagai ifo i le Tulafono Tau Faaofi lenei, ona e le o se Tulafono faigofie i totonu o le itumalo o Faleata Sisifo ma Faleata Sasae, ona o lea ua laulau mai nuu nei e aafia ai pulega a alii ma faipule. Aua a fai nei ae sau le faipule o le taulaga lenei ae le o se matai i totonu i le itumalo o Faleata, ou te iloa lava o le a i ai se feeseeseaiga o le a oo mai, e ese mai, vaeatu foi sui usufono o lo o i ai nei, ona e ese le vaega lena, ona o sui usufono na, o sui so o se tagata i totonu o Samoa lea na i ai le Individual Voters, sa alu uma i Samoa atoa. A o le sui lea o lea ua patino lava ia Faleata Sisifo ma Faleata Sasae. O lona uiga, e tatau foi ona tele se sao o itumalo nei e tilotilo ai i ituaiga vaega nei.

O le vaega lona lua lau Afioga i le Fofoga Fetalai, o le vaega lea i le resitala lea e taua e nisi i tagata foi nei faapea o le a saina ai le alii ma le tamaitai loa. Na ona ou fautua atu, po o le a le mea ua le mafai ai ona tuu i ai le faifeau, aua silasila, e le saina fua le vaega lea. O galuega foi faa-loia o auunaga e tatau ona fai faapisinisi, ma e tatalo atu ai i le Komisi sei toe tagai ane, pe ua i ai se faaletonu o nai faifeau o lo o i ai i totonu o nuu, pe filifili ni faifeau toaina pe toalua pe toatolu o lo o i ai i totonu o nuu e mafai ai ona latou faatinoina le vaega lea.

O le isi vaega lea o le tagata foi lea e resitala i totonu o le itumalo le faatinoina o le vaega lea. I le taimi lenei pei ona ou talanoa atu, a faapea – o lea ou te vaai atu i le Tulafono Tau Faaofi, a faapea la o Faleata, aua o lea la ua tolu nei ituaiga vaega e mafai ona palota ai le tagata e nofo i totonu o le itumalo lenei o Faleata Sisifo ma Faleata Sasae, aemaise foi Vaimauga. O le vaega muamua, o oe o le tagata e te matai pe e te fai nuu ai i totonu o le vaega lea. O le vaega lona lua, o oe o le tagata o lo o e nofo i se fanua tumaoti. O le vaega la lea ou te fia malamalama ai, o le tagata foi lea o lea e nofo i le fanua tumaoti i totonu o le itumalo lea o Faleata Sasae, ae fia palota i le mea o lo o matai ai, ae fia palota foi i le vaega na sau ai i le nuu o lo o i ai. E i ai le isi vaega o le a le faatinoina o le vaega lena?

E i ai le isi vaega lea o le Tulafono Tau Faaofi, se faamolemole lava sei faamanino mai le vaega lea e faapapalagi mai i le Tulafono Tau Faaofi, o le vaega muamua ma le vaega lua, lea e pei e faamaoti lava ia Faleata i le introduction lea o le Tulafono Tau Faaofi i le “(b) lea e faapea mai; o le tagofia o faafitauli o tagata palota (e aunoa ma ni sootaga tau tupuaga) o lo o nonofo mau i totonu o itumalo faa-alaafaga o Faleata ma Vaimauga, o i latou ia ua faatumulia ai pepa o le faasologa o igoa o ia itumalo faa-alaafaga;” Se faamolemole lava sei faamaoti mai lava le uiga tonu po o fea e agai i ai le vaega lena. Ma le vaega lona lua foi “(c) o itumalo faa-alaafaga ina ia aofia ai so o se tagata (tusa lava po o umia se suafa Matai pe leai foi) o lo o nofomau i totonu o itumalo faa-alaafaga o Vaimauga po o Faleata;” O vaega la ia e lua atonu a faamalalama, ona o le faatatope o le Tulafono Tau Faaofi ua le maua ai se taimi e sailiili atili ai i le vaega lea. Ae atonu a faamalalama le vaega lea, ua malamalama ai se tele o vaega pei ona ou taua.

Ou te faafetai foi i le... o le suesueina o le Tulafono Tau Faaofi lenei, sa ave i ai le savali foi a le matou foi itumalo, ona e i ai ni vaega sa vaavaaia. A vaai i totonu o le Tulafono Tau Faaofi lea i le isi vaega o le Tulafono Tau Faaofi lea e faapea mai ai, o lo o faaoga lava le lola lea sa i ai le Individual Voters i

le palota lea o le a sau. Sei faasao mai au pe sese i le vaega lena, o lea e faapea mai e faaaoga lava le lola lena a le Individual Voters i sui o le taulaga lea i Sisifo. Se faamolemole la sei tagai ifo i ai pe sao o lo o sau i se tasi o vaega lea e i le Itulau 27 i le Vaega 3 o lo o faapea mai; “O tagata o latou igoa o lo o aloaia le faamauina i totonu o le pepa o faasologa o igoa o tagata palota taitoatasi, a o lumanai ai le amata faamamaluina o le Tulafono o Teuteuga o le Tulafono o Faiga Palota 2014, ua faatatauina e faapea ua faamauina i lalo o le itumalo o nuu i le taulaga, lea o lo o nofomau ai le tagata. O lenei aiaiga e faatoa faaaoga i le Faiga Palota Aoao 2016.” O le mea po o le tagata fou lea faatoa resitala nei i le vaega lea? O le uiga o lau fesili lea, po o le a toe resitala uma lava le lola lea a Faleata i Sisifo lea e i ai le vaega lea o le taulaga i Sisifo, ae faapefea le vaega lea sa i ai i le lola tuai a o lea e nonofo i itumalo ia e lua lea e tau o le taulaga i Vaimauga ma le taulaga i Faleata. Pe faapefea la vaega ia ua uma ona resitala, pe aoga lava le lisi lena? Aua a silasila foi, e eseese vaega sa fai ai lisi ia, o le lisi muamua e fai o oe e i ai lou faaiu foi lea pei ona silafia. A o le mea la lea, o le mea fou le mea lea, e tatau ona e nofo i totonu o le... E tusa lava la pe faapea mai o lea sa e resitala i le vaega.... ae e te lei resitala ona o lou nofo i totonu o le fanua tumaoti, na e resitala ona o lou faaiu. O le mea la lena o lea e fesiligia ai le lola lea, pe faaaogaina lava le lola lenei, aua e i ai lou talitonuga, e tatau ona toe fai se lola fou i totonu uma o le vaega lenei.

Ia, o nai au fesili na, e tuu atu ai lau fautuaga, sei toe tagai ane lava i le Tulafono Tau Faaofi, aua e i ai lava lou manatu, afai ua faataape itumalo o Samoa i vaega uma lava ua i ai le atunuu pei ona tagatagai... E pei foi ona saunoa se tasi o Minisita, e i ai itumalo e taitasi lava nuu tasi le sui. O le tasi lenei vaega o Samoa e ese ma le toatele. A tagai i ai i le lola palota iinei i Faleata Sisifo ma Faleata Sasae, aemaise foi Vaimauga Sisifo ma Vaimauga Sasae, o lola lava nei e aupito i sili ona tetele i totonu o le palota lenei, e tai oo i le 6,000 i le 7,000. A resitala uma nei e tai oo i le 10,000. A tagai foi i ai i le faitauaofai o tagata Samoa lea na aumai nei le tala o le faitauaofai o tagata Samoa, o i inei, masalo po o le 60% o tagata Samoa e nonofo i totonu pe ova atu foi i totonu o le vaega lenei. Sa i ai la lou manatu, po o le a le mea na le tagatagai ai le Komisi aemaise foi le Kapeneta i le vaega, ave sao lava sui nei i totonu o Vaimauga ma Faleata, ave sao i ai. E pei lava o le faiga o isi itumalo lea e i ai nei o le tatou atunuu, o la e lava e ave ona faanumera lea, sa faanumera 1, 2, 3. E fua, aua o lea ua ou faalogologo atu nei, pei e faaletauaina le toatele, e faataua lava le vaevaega o itumalo ma nuu i le sauga o Samoa i le va o nuu ma alaalfaga. O lea la ou te talosaga atu ai, o le a le mea ua ala ai ona toe fai ai foi lenei... afai ua tatou mananao e uniform atoa le faiga o le Tulafono Tau Faaofi lenei ina ia tutusa uma le faiga o Tulafono i totonu o le atunuu, o le a le mea ua toe oso mai ai lenei mea e tau o le sui o le itumalo, taulaga, itumalo o nuu o le taulaga i Sisifo. E leai se alaalfaga faapea i totonu o le atunuu lenei. Ae tatau ona aumai faapea, o le sui o Faleata ona aumai lea e fai ai le vaega lea, tuu i ai le vaega lea ae aveese le vaega lea, ae tau i ai, o le sui o Faleata, ona i ai loa lea o le sui, sui o Faleata Sisifo, sui o Faleata Sasae ma le Sui o Faleata Atoa i totonu o le vaega lea. Ou te iloa e tatau foi ona faapena le faiga o Vaimauga, ona ogatasi ai lea o le faiga o Tulafono ma le faiga uma o vaega ia e suisui ai itumalo taitasi o lo o i ai nei. O lou manatu, e le o suia ai le tele o Tulafono, ae na pau le mea, e i ai lava lou manatu e tulai mai nei se sui i totonu o le Fono ona faapea lea o lau

Afioga i le Fofoga Fetalai, ia tulai mai le sui o le itumalo o Taulaga i Sisifo, a? Ae manaia lava le faapea, tulai maia le sui o le itumalo o Faleata.

E pei o lou manatu lena atonu e i ai se taimi ona... ae ona o le sui o lea e patino i tagata e nonofo i totonu o Faleata. A fai faapena le vaega lenei, e amanaia e le itumalo le sui lenei, e matua amanaia e le itumalo, a fonu le itumalo, e amanaia foi e tagata o lo o nonofo i totonu iinei, ona o lea ua alu o tagata o le itumalo o Faleata.

Ia, lau Afioga i le Fofoga Fetalai aemaise le Afioga i le Minisita e ou le Tulafono Tau Faaofi, na o ni nai manatu e faataatia atu i ina, semeamanu e lei pasia le tatou Tulafono Tau Faaofi. A fai loa le vaega lea, masalo ou te matua lagolagoina lava le Tulafono Tau Faaofi pe a faatino. Ma lou faaaloalo lava.

FOFOGA FETALAI: Malo faafetai i le folasaga manino a lau Afioga i le sui usufono mo Faleata Sasae. O lea lava ua talatala ma le la lou finagalo, ua manino atoatoa ai le taumafai mai ona o le aafiaga o le itumalo.

Ia, tulai mai le sui usufono mo Falelatai ma Samatau ona avatu ai lea i le sui usufono mo Faleata Sisifo.

Afioga TAEFU LEMI (Falelatai ma Samatau): Malo faafetai i lau Afioga i le Fofoga Fetalai. E leai o nai manatu laiti lava lau Afioga faapea foi le paia o le Maota. Ua malie finagalo o nisi o sui usufono e uiga i le faaaogaina o loia, ma e auai foi lenei sui usufono i lena tulaga, atonu e lelei i se isi itu, ae ua faaopoopo le tau ia i latou o lo o fia taufetuli i le palota.

O le mea muamua e totogi le loia, ia ua tele lava nisi faiga sa tatou faia ai, sa tatou amata mai o i ai nai matai e faanumera, e fia matai o le afioaga e omai e nominate le latou sui i luma o le komesina, ia pe e le o se undertaking foi e mafai ona fai i luma o le komesina lea mea, nai lo le tau tuliloa e fai e le loia, ia e taugata foi le faiga o tatou Faamasinoga o fai nei i mea o palota, a o lenei foi o le a faaopoopo le isi vala lea, ae manuia ai alo ia, pei o le agaga lea. A o le mea lea e tau fai ai se manatu i le itu lea, ona o lea e tau fai lata tautinoga a o la e fai lata tautua i le nuu, fai lata tautua i le lotu ma tulaga faapena, a o lea e tau fai i luma o le loia lea e i Apia nei. Ia ua tatou malamalama lava i le soifuaga lea tatou te soifua ma ola ai i le faamaoni foi ma le faatuatuaina o lea faatinoga. Ae pei o le agaga lea lau Afioga i le Fofoga Fetalai, o le mea lea o le a i ai nei, aua e oo i le aso e tapuni ai sui faatutu o le faiga palota, e tetei lava itumalo i le lau atu, ua fia sui ia ae tasi lava le sui la e nofonofo i tua ma aoga i ai, ae o lea ua lote i Apia le tele o mataupu ia e tataua ona lote i tua, o le agaga lea i lata ita vaavaai.

O le isi mea, a faapea nei ua alu le sui lea e i Apia, e mafai la o i ai se vaega o le Tulafono o i ai se avanoa mo afioaga e mafai ai ona omai faapea mai, sei faatali lava la sei tau saili atu lava pe i le amiotonu o le tautinoga lena? O le a le tautua na fai i le lotu, o le a le tautua na fai i le nuu, e i ai se vaega o le Tulafono o aiaia ai lea vaega? O le uiga lea o se faamatalaga. Pau lava le vala ua ta vaai atu ua tau feoloolo ai le faaaogaina o loia, se sei tau taofiofi ai le mea lea o le transfer, le mea lea o le alu o le isi liliu i le isi vaega, le isi itumalo liliu i le isi itumalo, o le a taofiofi ai, ona e i ai ma le tau e totogi? Ae pei o manatu lea i lea vaega.

Na saunoa i o'o. Ia o taaloga lea ua tatou masani ai, ua leva ona faatino e nisi o le tatou Maota nei ia o lea foi ua faataitai atu i ai ua ta masani foi. Ia ae atonu e lelei foi le taatia sei fai mulimuli, ae masalo o le tele o mea lea o le a

feagai ma itumalo, na o folafolaga lava mai le amataga a o lei faia le palota, ia o le tagata lava e lelei lana polomisi ma lana folafola, ia atonu e maua ai sana palota faaopoopo i lenei vaega.

Lau Afioga i le Fofoga Fetalai, ua ou tau maitau atu e tau atugalua isi i le mea lea o itumalo ua vaelua, se o le itumalo lenei o lea e fia vaelua lau Afioga i le Fofoga Fetalai, ou te le iloa po o lea e mau i a tatou faamaumauga le talosaga a lenei itumalo o Falelatai ma Samatau e tataua ona lua ni sui usufono. Ou te iloa leaga o le Tulafono lea o lea tatou te agai i itumalo ua iloga lava ona tailua sui usufono, ae lelei foi ona toe faamau i a tatou faamaumauga, sei toe silasila ae i lenei itumalo e le o ni tamai nuu, o Falelatai e le o se nuu laitiiti, Samai, Falevai, Matanofo, Levi, Nefunefu, Matautu, Puna, Pata, Siufaga, e lei uma atu le lisi lau Afioga, ia e tele le itumalo e tataua ona silasila i ai, e le faatusalia i ai nisi o itumalo e faale o toatele nisi o afifio ma papaaao ai e laitiiti foi le numera o le au palota. Ia pei o nai motugaafa ia lau Afioga i le Fofoga Fetalai, faafetai.

FOFOGA FETALAI: Malo saunoa i le sui usufono mamalu mo Falelatai ma Samatau. Ia tulai mai le...oi malie lava le sui usufono mo Faleata Sisifo, malie, leaga sa ou taua muamua le sui usufono mo Satupaitea, ne i meaane ua misi i lau vaai le tulai mai o le sui usufono mo Satupaitea ia ona avatu loa lea i lau Afioga.

Tulai mai le sui usufono mo Satupaitea.

Afioga LAUTAFI FIO SELAFI PURCELL (Satupaitea): Faafetai i lau Afioga i le Fofoga Fetalai. Leai ua ou tulai atu leaga pei sa sosoo au i le lisi ae ua ou vaai atu ua tau tu ae le sui usufono lea mo Faleata Sisifo. Ua tulai soo foi ia i luga i lenei aso.

E faatalofa atu i le Maota ma le faafofogaaga a Samoa, e faapea foi si ou itumalo o Satupaitea. Lau Afioga e tulai atu e fia avatu foi ni motugaafa ma ni manatu e uiga i le Tulafono Tau Faaofi ua tatou talanoaina i lenei aso. E le natia lava le manatu o le sui usufono lenei, sa i ai le talitonuga o le sui usufono lenei o le Tulafono silisili lava lenei ona taua o lea o le a tatou pasia i le tatou agai atu i le Faiga Palota, ua leva foi i le tausaga lea na tea o faatalitali po o le a se taimi e tuu mai ai i totonu o le Maota, ia pe tuu mai foi sei tatou tilotilo i ai. Pei na gata lava le taimi na ou iloa ai le Tulafono lenei o le taimi sa ou alu ai i o i le Komisi e ave ai foi i ai ni manatu, a o lea ua tuu mai i le Maota i se tulaga faatopetope. Ia o le a ou le toe sasaina le solofanua ua pe pei o lea alagaupu, ae faaali pea lou le fiafia i le auala ua aumai ai i le Maota lenei le Tulafono i se auala faatopetope, ae o se Tulafono e tataua ona tatou fai manatu i ai. O lea la o le a tau fai atu uma manatu nei i se tamai laitiiti ae ou te lagona e le taitai ona malamalama uma ai ma faamalieina uma ai finagalo o sui usufono. E ui i lea lau Afioga, e faafetai atu i le Minisita ma le Komesina o Faiga Palota mo le faataatiaina mai o le Tulafono Tau Faaofi lenei, o lea ua tilotilo atu, ia e tele lava nai vaega ia sa ou talatalanoa ai i le Komisi, lea ua ou vaai atu ua sau ai i i, faafetai. O le vaega lea sa ou mamafa lava i ai o tulaga lea i mea nei o o'o, e faapea foi le faamavae o i latou o lo o galulue i galuega a le Malo. O lau talanoa atu i mea nei o o'o, ona o le tasi lava lenei vaega sa faafitauli tele i le Komisi i lau talanoa atu i ai, ona o le tasi lea vaega sa aliali mai ai ni faiga faaalatua i le taimi o alu atu agai i le faiga palota, o lea sa tuu mai foi le taimi e tolu masina ae lei faia le palota e mafai

ona fai ai o’o, ia ae e le mafai foi ona tausisia na mea. Ona tulaga mai lea o tatou faiga palota pei ni faiga palota foi lea e le o sao le faiga. O lou talitonuga i le o’o, o lea ua talafeagai lava le mea lea ua i ai, ina ia puipuia ai sui. O le sui usufono lava latou ua i ai i le taimi lenei e mafai ona fai lona o’o i le taimi lenei, o lona ia lava na tautua i lona itumalo. Ae o le taimi lea ua latalata loa i le palota pei o le mea sa i ai, ia o lou talitonuga o i ina na maua ai le manatu o alatua la mea na, it’s the perception o le o’o ma le timing o le o’o. Pei o le tulaga na e lua i lou iloa, o i ina na tulai mai ai le faaletonu, atonu o le manatu lava o le faipule ia po o le sui o la e fia tauva, o la e sao lava le avatu lona o’o i le nuu o lea o le a alu atu e tamoe ai, ia a o le vaai foi lea a le isi tagata lea o le a tauva, o le faatosina la le mea lena ua fai, a o lea la ua tuu mai i i, e iloa lava le tagata e alofa i lona nuu e tusa lava pe faiaina, alu pea e fai sona o’o pe a uma le faiga palota, ia a o le tagata o lea ua toe tulai mai, ia o tulaga lava na, ae pule foi ia pe fai sona o’o aua o lea ua faipule. Ou te lagona o le sui usufono lava ia e alofa i lona nuu pei o au, e fai lava lou o’o pe a.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Ia malie le sui usufono, sei tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Na ona ou fesili atu lava ae o la ua tali mai, e fai moni lava sou o’o pe a e faiaina?

Afioga Hon Leaupepe Toleafoa Apulu Faafisi (Aana Alofi Nu. 1): Mo le faasaoina o le taimi o le sui usufono.....

FOFOGA FETALAI: Ia malie le sui usufono mo Satupaitea, sei tuu mai le avanoa i le Afioga i le sui usufono mo Aana Alofi Nu. 1.

Afioga Hon Leaupepe Toleafoa Apulu Faafisi: Ona ua mamafa lava ma inaina le saunoaga a le sui usufono mamalu faapea e faatosina pe faasolitulafono le faiga o o’o, ae o le oi’o lava latou e so o se isi lava e fai sona o’o, e le faapea na o le tagata e.....o lea la ou te manatu pea afai e faamaonia, a faiaina e fai lava le o’o pe.....ia ona tau mai lea, e amiotonu le mea lena na te faia. Ma le faaaloalo lava, faafetai.

FOFOGA FETALAI: Ia tulai maia le sui usufono mamalu e faaauau le saunoaga.

Afioga LAUTAFI FIO SELAFI PURCELL: Faafetai mo faauilavea a sui usufono mamalu, e le o ni sui usufono laiti foi ia na faauilavea i lau lauga. O le tali i le faauilavea a le.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Ia malie.....Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mataupu lea lau Afioga i le Fofoga Fetalai, se o le mea moni lava, se pei tatou o se atunuu piopio e tumu i tagata piopio ma le fai mea pio, o au ua le iloa o tulaga uma o Faiga Palota, se e tumu le internet ma face book e alu atu i fafo ma tau le amiotonuina ai ia i latou ua filifilia e avea ma taitai o le atunuu, ae leai lava ni mea faapea o tutupu i isi atunuu, e pei e faaataata lafoga foi lele le mataupu lenei i o'o o mataupu o totonu lava o tatou tu ma a tatou agaifanua, o mea o o'o e tatau ona fai. A o lea la ua faatulaga atu i i i luga e le o se taimi muamua foi lea ua aumai ai i totonu o tatou Komisi Suesue le tuualalo ina ia taumamaina ai le tatou atunuu e taofia ai lea mea, aua e le mafai lava ona uma le mea lenei o le fetaua ai, masalo ou te le iloa pe na fai ni uiga faatamalii i la aso, o le uma mai lava, leai loa ma se faamasinoga e toe faia ma talia ē ua malolo i latou ua manumalo. A o le mataupu lenei o Faamasinoga ma alu atu pea i fafo i tatou Faiga Palota uma lava ma Faiga Palota ma laulau ai lava Samoa, o se atunuu e tumu i mea o taitai piopio, fai mea piopio, a o mea lava ia o o'o. Pei la o le autu o le Tulafono, se o le taumafai ina ia faasaoina lo tatou atunuu mai tuuaiga ma tau mataga ai i le vaavaai mai foi isi itumalo. O le taua ia o le finagalo ia ua faaalai i le uma ai o Faiga Palota, faatapulaa loa ma fai loa ma o'o, ona le toe avea ai lava lea o nei mataupu o o'o o ni mataupu e tau o faatosina ma faapea ane ai loa, o le tu ma le agaifanua lea a Samoa ma taofia ai loa lea mea o le momoli o i latou o faipule ua manumalo i luga o mea nei ma tauvalea atu ai ma a tatou tu ma agaifanua.

Lau Afioga i le Fofoga Fetalai, o lo o taoto i le fatu o le Tulafono lenei le taumafai ina ia puipui ai ia lo tatou atunuu mai le tauvalea soo, tauvalea soo, tauvalea soo i luga o faiga Faamasinoga ma tuuaia ai i latou o lea ua manumalo i ni faiga piopio a o la e fai uma lava e atunuu i fafo ia mea faapenei, e le o taua o ni faiga piopio.

Lau Afioga i le Fofoga Fetalai, o le taua lena o le saunoaga a le sui usufono lea sa avatu ai se faafesili, e ui ina faapea o se tulaga foi lele e faaataata lafoga, ae o le agaga tonu lena o le Tulafono, sei tau tausii mamalu tau puipuia a tatou tu ma agaifanua mai le tuuaia pea tuuaia pea i luma o le Faamasinoga ma foliga ai o tatou o Taitai o le atunuu ua filifilia mai e avea ma sui usufono o le Palemene, o ni tagata ua tumu i le amio piopio.

FOFOGA FETALAI: Malo faafetai saunoa faamalamalama i lau Afioga i le Palemia. Tulai mai le sui usufono mamalu e faaauau le saunoaga.

Afioga LAUTAFI FIO SELAFI PURCELL: Ia faafetai i lau Afioga i le Palemia mo le faamalamalama atili o lenei mataupu. O le agaga tonu lava lea ua ou tulai atu ai, aua pei lava ona ou fai atu, o le tasi lea mea na ou talanoa ai i le Komisi o mea nei o o'o, o o'o lava latou, e leai lava se isi e na te natia o le tu ma aga faa-Samoa, tatou te taumafai foi e aumai ina ia fusia ai le tatou Palemene, ae paga lea, ona o mea ua tutupu, ua faauiga sese e tagata i le faiga o o'o, pei lava o le mea lea na ou fai atu, o le perception a tagata i le time ina o le o'o, e ala ai ona pei ua liliu le tatou aganuu ma le tatou tu ma aga, o se auala e le talafeagai. Ae o le manatu ia o le sui usufono, e leai e lagolago lava i le faia o tulaga faapea i sui usufono. O le fesili foi pe fai sou o'o pe a ou le toe tulai mai, e fai lou o'o e faafetai ai i lou itumalo ua ou le toe

tulai mai. Ou te tautino atu i le taimi nei, ae a ou manumalo ona faailoga fesili lea pe fai sou o'o. E leai, e fai pe a ou faiaina e fai foi pe a ou manumalo ma o le sui usufono lena e tonu lona loto.

O le vaega foi lea i tagata faigaluega, faafetai o lea ua ou vaai atu ua tulai mai iinei aua o lou lava faanaunautaiga ma le manatu i le tulaga lea e puipuia ai tagata faigaluega a le Malo mai le tuuaia e tagata e faapea o lo o latou faaogaina a seta a le Malo e fai ai a latou faatosina. E le faapea o se ita, a o le puipui i tagata faigaluega a le Malo ina ia aua ne i tuuaia i taimi a o lo o faigaluega i le Malo, a o la foi e manao e tauva i le faiga palota a lo latou itumalo.

O le tulaga lea e pei ona taua e nisi sui usufono i le mea lea o declaration criteria po o le registration criteria. O le tulaga lea e faale aafia ai tagata i tua, ae se i vagana tagata o lo o nonofo i Apia ae manao e alu i Savaii ae e le o i ai se monotaga. Atonu e manino lava le tulaga lena aua o la e iloa e nuu po o fai se monotaga pe leai. Ona pau la se faafitauli lea e tulai mai ai i lou manatu e fesili atu ai i le Minisita ma le Komesina o Faiga Palota ona o tagata ia e pei o le vaega lea e omai mai fafo, ae tupu ai le vevesi lea i le faitauina o o latou aso e nonofo ai iinei po o ua atoa le tolu tausaga. Ou te manatua e umi lava foi se taimi o fai e le Komesina o Faiga Palota le tau faavasegaina o passports nei ina ia fua ai aso na alu ai i fafo ma sau. O le mea la lena ou te le iloa po o ai e faia le galuega lena, po o se galuega lena a le loia po o se galuega a le tagata e fai, ae pe i ai se vaega a le Electoral Commissioner e fai latou te faamaonia ai pe sao le vaega lena aua na o le avatu lava i luma o le loia tauto, tauto saina le loia alu ma le pepa i tai, a o le vaega lena e faafaigata o tagata ia e nonofo i fafo, e omai ma o i fafo, omai ma o i fafo, ona tau faavasega lea po o atoa lo latou tolu tausaga e i ai le vaega lea sa fai e le Eletoral Commissioner.

Na o se faaopoopo atu lena, ae ou te auai i le vaega lea ona o le a tele foi lena tupe o le a alu, a o le mea na mafua ai ona fai lena vaega ona ua fai foi vaega a Pulenuu ma ua le tu le Pulenuu i lona tulaga tutoatasi. O le tulaga lena aua afai lava o le Vaega Faaupufai e i ai le Pulenuu, ona pau lava na o tagata e alu e lagolago. E pei o le vaega lena aua a leai se independent o le Pulenuu, atonu o i latou lava nei e tataua ona ave i ai pepa nei latou te saina. Afai foi e le o le Pulenuu aua e eseese lava nuu ma le tofiga o o latou Pulenuu, a o lo o i ai alii ma faipule o lo o pulea nuu e faapei o le matou itumalo, e i ai le pule ma o i latou la na e tataua ona ave i ai pe afai e le faatuatuaina le Pulenuu, a o le saina a le loia, e moni o le declaration under oath, ae leaga o le palota le mea lea tatou te talanoa i ai. Se i toe tagai i ai pe i ai se fesuaiga e mafai ona fai.

Ou te talitonu foi i nai faafitauli e pei ona tulai mai i itumalo ia o le a vaelua e pei ona faaalua e se tasi o sui usufono, le sui usufono mo Faleata Sasae. Atonu o a tatou Tulafono e faia i le faanaunautaiga ina ia toafilemu faiga palota, ae e le avea foi lena toafilemu ma mea e faaono aafia ai pulega a nuu taitasi ona o vaevaega ia ua tulai mai.

O se manatu o le sui usufono, e ao ona silasila totoa i ia tulaga ona e le aafia ai lou itumalo, but I can understand the feelings o nai itumalo ia aemaise lava pe afai e tulai mai ni faafitauli i nai urban seats i vaega ia i Vaimauga ma Faleata.

Lau Afioga i le Fofoga Fetalai, se i avatu lava se fesili i le isi Vaega lea e 25 o le Tulafono Tau Faaofi ona o lea ou te faitau atu i le faa-Samoa po o le a se

faasaoga ona e foliga mai i le 25(f), e pei o se vaega o le Tulafono e aafia ai Palota Taitoatasi. Atonu la o urban seats ia, ae a ou tilotilo atu i le faa-Peretania e pei o se faaupuga i tagata palota uma lava. O le fesili la po o fea le vaega e sao ina ne i t e i ua sese lau faitau, a o lau tilotilo atu i le faa-Peretania e pei o tagata uma lava e lua ni o latou suafa matai, e tasi le suafa matai e alu ai, le matai lea na muamua faatino. A ou tilotilo la i le itu lea i le faa-Samoa e pei e foliga mai o i latou i le Palota Taitoatasi e aafia i ina. E leai lava se vaega o le faa-Peretania o sau ai se urban seat, ae masalo o le eseese o le translation ae taua tele le mea lena e taumafai le clause lena e faamalamalama. Aua afai o le faa-Peretania e sao, o lona uiga e aafia uma lava tagata e tailua ni o latou suafa matai ona e tasi lava le suafa matai e faaoga. O le tulaga foi la lena po o ai e filifilia le igoa matai e faaoga e le tagata aua o isi matai, na matai i se suafa Tulafale foi lea a o laitiiti, ae ua matua ane ua tuu i ai se suafa taua. O lea la ua manao e faaoga le suafa taua lea, a o lea e tuu mai i le Tulafono Tau Faaofi e faapea o le first registration po o le igoa matai muamua. Po o sao lau faitau atu i ai ae se i tagai ane i ai lau Afioga i le Minisita ma le Komesina o Faiga Palota.

O nai manatu na o Satupaitea ma le fesoasoani atu, ae e faamalo atu i lau Afioga i le Fofoga Fetalai le faatoatoa i lena aso. E faamalo foi i sui usufono mamalu i le faaalua o latou manatu. E pei lava ona ou fai atu e le o se Tulafono Tau Faaofi e faigofie, ae malo le onosai ma le faapalepale. Ia manuia le Fono.

FOFOGA FETALAI: Malo saunoa le sui usufono mamalu mo Satupaitea. Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai lava i lau Afioga i le Fofoga Fetalai mo le avanoa. Sa i ai lava le faanaunautaga ma te sosoo ma si ou uso le sui usufono mo Faleata Sasae ona e tai foliga tutusa lona finagalo ma sou manatu, ae e le afaina se i ave foi le avanoa i nai sui usufono o lo o taumafai mai. O nai sui usufono ia e faapea mai e fai o latou o'o pe a faiaina. O au a ou manumalo e fai lou o'o i lou itumalo, ae a ou faiaina e fai lou o'o i lou fale. E lelei lena e faigofie ai ona faaagi mai le tagata e le i palota ia te au.

O ananafi lau Afioga i le Fofoga Fetalai sa faamanatu ai e tatou lou aso soifua faapea foi le aso soifua o le Taitai o le Malo. Ua tatou faamanuia ina ia saga tulua oulua soifua, a o le aso lena ua faailogaina e le lalolagi, o le aso lena na goto ai le vaa tele foi lea o le Titanic. O le Tulafono Tau Faaofi la lea ua aumai, ua leai lava se eseese ma le aso lea na goto ai le vaa lea. E pei e i ai se connection foi lea o mea ia e lua. O le mea lena o lea ou te nofo ae mamafa i lou mafaufau, e pei e i ai se connection, ae ailoga. O le taeao lena, o le tasi lena taeao faitaulia o le Paeaiga lena. Ua leva ona sauni sui usufono i le Tulafono Tau Faaofi lena. E moni aua o le tele o suiga ia ua tuuina mai nei ua leva ona faufau ma faufua mai e le Malo. O le ala foi lea sa sauni ai sui usufono po o fea tonu e agai i ai suiga nei po o taoto i lagatonu. E le mafai ona faamalieina e se Tulafono se tagata. E le mafai ona maua uma ni mea e faamalieina ai oe, ae i ai vaega taua e manuia ai tagata lautele ma i ai suiga lelei e atagia ai suiga lelei mo le atunuu atoa ma Samoa ma lona Palemene, o suiga ia e le mafai ona alofia e tatou. O le ala lea sa tau tuu atu ai se fautuaga a lena Itu i le taeao i le mafuaaga ua faavavevave ai lena Tulafono Tau

Faaofi taua. O lea ua outou faafofoga i le tele o finagalo o sui usufono i le tele o galuega e ao ona toe tagai lelei i ai i lenei Tulafono Tau Faaofi.

E faafetai i le Afioga i le Minisita ma le Matagaluega. O le mea taulia i lou sui usufono ona ua aumai le Tulafono. O lea ua outou tagai ma tatou vaavaai, o lea o le a avatu le tuualalo i mea e mafai ona toe fai ai suiga pe afai e i ai se avanoa. Ou te talitonu e i ai le avanoa e mafai ai ona toe sui ma toe tagai ai i ai.

O le mea muamua, o le faafitauli e tulai mai pea i faiga palota i Paeaiga taitasi i le tele o tausaga ua mavae, o mea ia o petition po o le mea lea o le molia e isi sui tauva o isi sui tauva i le Faamasinoga. E tele tupe e alu ai ma tele taimi maumau. O i ina la, o le tasi lea vaega na ave e le toatele o i tatou ia na o i tai i le Komisi Suesue, po o le a se faiga e faaitiitia ai lea mea. E le faapea e taofi, ae ia faaitiitia ma taumafai e avoid le mea lea ma le tupu soo mai. O lau vaai i le suiga lea na aumai, e pei ua aumai ua atili ai ona faafaigofie ona fai. Sa tatalo i ai ona o mea nei o lea e faaoga uma e atunuu, le system lea e ao foi ona faaoga e tatou. E ave le paketi, e ave le tupe e faataga e faaoga e lea sui tauva ma lea sui tauva e tapena ai lana palota. E amata i le aso e avea ai ma sui usufono e oo i le aso e muta ai ona avea ma sui usufono, a valaaulia oe e te alu ma le tupe. A oulua fetau i le tagata i le taulaga e ave i ai le pasese pe a fai mai. O mea masani, ae faapefea ona molia oe ma aveese lou tofi i le \$10? E i ai taimi e le alu ai lou mafaufau i ia mea. A oulua fetau i le taulaga ma se isi o lou itumalo pe e te alu atu ae oso mai, “Se i aumai sau mea lena se i ou pasese ai?” O le mea e masani ai, pe e le o oe o se sui usufono e fai lava. Ae molia ai oe i le \$10, ae faapefea le \$1,000, \$2,000 ma tai \$500 i aso uma aso uma pe a valaaulia oe i mea e fai a le itumalo ma le Malo? E te le alu ma sou tofi faipule i se valaaulia ma se \$100 pe \$200. E ala ona le sainia lau siaki ona ua pe le mata o lau peni lau Afioga, ioe. O le mea lea sa i ai le manatu ia tagai lelei le vaega lea e faia Tulafono ia amata i le vaega lea ina ia taumafai e faaitiitia le mea lenei, ave se vaegatupe i sui tauva e faaoga e tapena ai e fai ai lana palota. E leai se faipule i le lalolagi lenei e le alu sana pene apa e tapena ai sana palota.

O lona lua lau Afioga i le Fofoga Fetalai, o le Tulafono o lo o i ai nei e compulsory le registration, e faamalositia lau resitala. Sa ave la i ai le talosaga a le toatele o matou, afai e faamalositia le resitala, aisea la e le faamalositia ai le palota? E fetau mea nei e lua. O le a le mea na o atu ai e resitala ae a oo i le palota ona nofonofa lea i le fale? O le mea lena e ala ai ona o faipule e lau mai tagata, aua foi a le aumaia e le o foi e palota. A le aumaia e resitala e le omai. E ala ona faigofie ona sau e resitala ona ua iloa o le Tulafono e faasala pe a le sau e resitala. Ia, ou te le iloa pe ua faasala ai se isi, ae a oo la i le aso o le palota e nofonofa lelei lava, seiloga foi la tatou te toe o atu e aumai. A o tuuaina ia e faapea o lo tatou o e aumai, ae a le aumaia a o le a faapefea ona palota? O le a faapefea ona fai faaiuga e fai? O le tasi lena mea sa fautua i ai i se suiga i le Komisi Suesue lenei lea na fai nei se i tagai i ai.

E oo i palota a itumalo ia e tailua sui, o lea ua omai nei e vaevae itumalo, ae faigofie lava le mea na ave i ai, ae a pe a tatala ia ia faasa block vote ae taga le tailua palota?

O le vaega lea ua faapea mai ia saini na o le Loia, faafetai i lau Afioga i le Minisita. O le mea na tupu talu ai ona ua tamau na o le Pulenuu ma o le faafitauli lena. O le mea foi la lena e tupu pe a tamau na o loia, ae tatala pea le avanoa o le Loia, Pulenuu ma le Faifeau. O lea ua saunoa le Minisita mo

Tina ma Tamaitai, Atinae o Nuu ma Afioaga ma Agafesootai, aua le tauleagaina Pulenuu leaga e le tutusa uma Pulenuu, ae ave i ai le faatuatuaga aua o latou ia o lea e faia nuu. Ua tau tagata nei o Sui o le Malo, o lona uiga ua fai mai e leaga sui o le Malo; e piopio. E faapefea faifeau? O latou na o lea e laugaina le Salamo i le ao ma le po, God is so good, se faaoga e saina ae aua ne i tamauna na o le loia aua e iu foi ina fai se fee a le loia ia.

Lau Afioga i le Fofoga Fetalai, ona oo mai lea o lou manatu i mea ia ua tulai mai i totonu o itumalo nei. Ina ua faaopopo sui faipule o itumalo nei o lona e silafia e sui usufono mo Safata ma le tele o sui usufono matutua o le Palemene lenei ma le sui usufono mo Salega, e tasi lava le mea na ala ai ona faaopopo, e tasi le mafuaaga ona ua alu i luga le faitau aofai, ua toatele tagata palota ua justify ai ua tatau ma alaga tatau ai ona lua sui usufono, ae leai lava ni nei mau gasu e lau mai.

O le mea lea ua tulai mai i totonu o Faleata ma Vaimauga, ua faaopoopoina tagata palota ona o i latou fai mai. O lona uiga, faaopopo sui usufono o itumalo nei ina ia atagia ai lava le faamaoni i le mea na fai mai ai muamua ma suiga sa i ai muamua. Ua alagatau. O le tele o i latou nei e nonofo i fanua tumaoti, a e sau e faatau lou fanua i Fagalii pe faatau lou fanua i Vaitele, e le faapea a uma ona faatau ona e faapea lea, o lea ou te te nofo i fea. O lona e te nofo i Vaitele, o lona e te nofo i Fagalii, o lona e te nofo i Vaialele. E le o mafai ona aveesea igoa o itumalo, leaga o itumalo maoti, o nuu maoti ma nuu mavae o le atunuu, o i latou foi e ou eleele. O i, pei ona saunoa le sui usufono, o i lea e malu ai nai tagata nei, o la e foi e ave i ai le filifiliga saoloto e faitalia latou pe palota i nuu mavae, pe palota i le mea na sau ai. O Vaitele, e ova i le 10,000 tagata o lo o nonofo ai nei. O lona uiga, e lata i le 5,000 tagata e agavaa i le palota. O le palota lea na uma atu nei, e le atoa se 2,000 o ni tagata na palota ai. O lona uiga, o le toatele o tagata nei e nonofo i i, o la e palota i tua i latou nuu. A o le mea aupito sili ona taua lau Afioga, e le faapea e malo se sui ona e faapea o le toatele o tagata palota i le mea la e nofo ai. E leai, e malo le sui ona o le sui lava ia o la e fiafia i ai tagata. Sa ou faia foi e au ia, pe ou te alu i se nuu toatele pe toalaiti, ae a fiafia lava tagata i le sui ma vaai atu o le sui e aoga, e palota i ai. Ioe. A outou vaai i le nuu lea o Vaitele i le taimi a o palota na o matai, na o le 18 matai o Vaitele. O le aso, faatoa toaluasefulu ia Tolofua, o lea o le a faamatai ma le Afioga i le Palemia ona faaluasefulu ai lea o matai o Vaitele, aua o faiaava a le nuu nei vaeane le Afioga i le Palemia ma le.....

FOFOGA FETALAI: Se malie le sui usufono mo Faleata Sisifo, sei tuu atu le avanoa i le faauilavea a Samoa Aoao. Tulai mai se tasi o sui usufono mo le Au Palota Taitoatasi, Afioga Maualaivao Pat Ah Him.

Afioga Maualaivao Pat Ah Him: Lau Afioga i le Fofoga Fetalai, i lau faalogologo atu i sui usufono o itumalo nei o Faleata Sisifo ma Faleata Sasae, tusa o le avanoa lelei lea ua maua e laua ua tauanau ai tofi nei o le itumalo lenei o le Palota Taitoatasi. I lau faalogologo atu i ai, pei ua vavao i le suiga lea o le a i ai, ona o le agaga tonu lava lea, e le o malepe le itumalo o le Palota Taitoatasi, o lea e maopopo ae ua fai i ai le iuga a le Komisi o Faiga Palota. O lea la ua ou faalogologo atu i sui usufono nei e lua, o le agaga lava lea e tasi, e pei ua agai lava ina manao ia fa sui usufono. O le agaga tonu lava lea sa lagona ai le faanatinati o lenei Tulafono Tau Faaofi i lata vaai i nuu ma

afioaga o lo o aafia i totonu o itumalo fou nei o le a faatulai mai o nuu o le taulaga. Sa ta lagona lava i le taulaga o se faataitaiga i le lotolotoi o le taulaga, e le oo atu i alaafaga o itumalo nei ua saunoa mai ai sui usufono nei, o sui usufono lava pei na ona togi lava i ai, vaeatu lava le Maota, o sui usufono nei, maua, i ai i i ona faalotolotoi ai lea i totonu, ae o le agaga tonu lava lena. Ua matou faalogologo atu, o lea ua saunoa mai lava ina ia faaopoopo latou sui, ae o le agaga moni lava, sei toe silasila ifo i afioaga pe a faapea o le a faaauu tulaga, e le o aafia i totonu o itumalo fou nei o le taulaga. E manaia le agaga ina ia represent, a i ai pea mo i latou o lo o nonofo i le taulaga, o i latou o lo o nonofo tumaoti, e pei e le o agai e fainuu, fainuu o lo o i totonu o le taulaga i afioaga nei, o lo o i ai lava pulega o le taulaga, e le o i ai ni pulega o nuu mavae pei o Faleata Sisifo ma Faleata Sasae. Ma le faaaloalo lava. Faafetai.

FOFOGA FETALAI: Malo.

Tofa Aveau Tuala Lepale Niko Palamo: O le mea e fia faamalamalama lau Afioga i le Fofoga Fetalai.

FOFOGA FETALAI: E leai na tuu atu lava le avanoa ona o le atugaluga o le sui usufono ona o lea ua aliali mai lua finagalo o lea ua tauanau e sui usufono mo Faleata Sisifo ma Faleata Sasae lua nofoa, ae leai, o lea lava ua faatulaga le Tulafono Tau Faaofi, e tau o sui o le taulaga. Ae ona o Faleata Sisifo ma Vaimauga Sisifo ma Faleata Sasae ma Vaimauga Sasae, o le taulaga lea. O le ala lea ina ia maioio lelei, nei tei ua i ai le atugaluga i a oulua Afioga o lo o i ai a tatou lisi, ma e le mafai ona o ese tagata nei mai lisi a le Au Palota Taitoatasi o lo o tatou i ai i le taimi lenei, tausii lelei tatou lisi na masani ai, fagafaga lelei le itumalo pei ona masani ai, valavalaau ma fai a tatou fono masina pei ona masani ai. E leai la se mea o le a o ai fua i le mea lea e valaau mai e Faleata ma Vaimauga ma le tulaga lena. Ae aua e te popole lau Afioga i le sui usufono mamalu, o le Tulafono Tau Faaofi o lo o tuuina mai, o sui o le taulaga. Ae ona o lea e aafia i saunoaga a Faleata ma Vaimauga, ona o Faleata ma Vaimauga, o le taulaga lena o le tatou atunuu.

Tulai mai le sui usufono mo Faleata Sasae.

Tofa Aveau Tuala Lepale Niko Palamo: Lau Afioga i le Fofoga Fetalai, o se mea e fia faamalamalama lau Afioga, ona o lea ua tau mai lou nei sui usufono a o lea ua uma lau lauga. Ae a tagai le sui usufono mamalu i nuu ia e tau mai ai le itumalo fou lea, ona e tago lea e faavasega tuaoi ia, o le itumalo lea e sau i i, o le igoa o Faleata, o le mea lea e ala ai se manatu. E le o se itumalo faataatia foi lele a omai ni sui ona sui lea e nisi o le igoa o le itumalo. O nuu uma lava ia e sau i i, o le tuaoi lea o nuu o le itumalo lenei, o Faleata, lea e tuufaatasi ai Faleata Sisifo ma Faleata Sasae lea na ala ai ona ou tulai atu. Ma le faaaloalo lava.

FOFOGA FETALAI: Malie le sui usufono mo Faleata Sisifo leaga o lea sa taua le suafa o le itumalo, sei tulai mai le sui usufono mo le itumalo o Vaimauga Sasae.

Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi): Ioe, leaga o la e faafofoga lou itumalo i Vaimauga Sasae. Matou te le o faitio lava, o lea e olo lava le fua ma faalogologo i finagalo, matou te le o faitio. Nei tei ua avesese se faamatalaga i le faafofoga mai, e le o i ai se leo o le Vaimauga Sasae i le taimi nei, masalo o se taimi mulimuli ona fai atu lea o se sao o Vaimauga Sasae.

Tofa LEALAILEPULE RIMONI AIAFI: Faafetai i le faauilavea a si ou uso a sui usufono mo Samoa Aoao. E lei i ai sou manatu tele i le faauilavea a le Afioga i le sui usufono mo le Au Palota Taitoatasi, Afioga Maualaivao Pat Ah Him. Ia manatua foi ina ua oo mai i le taeao avatu le Tulafono Tau Faaofi tu ae loa saunoa, ua ou tei, e o lua la le tei ma le vaivai o le fatu ma le mafaufau ona pogisa ai lea o le vaai i le Tulafono Tau Faaofi. Ia, tuu avanoa pea i le Afioga i le sui usufono.

Lau Afioga, o le uiga o lau faamatalaga na tau oo i ai lau lauga, po o a lava vaeveaga tatou te faia ma tagata palota...

FOFOGA FETALAI: Malie le sui usufono mamalu sei tuu atu le avanoa i le faauilavea a se tasi o sui usufono mamalu mo le Au Palota Taitoatasi.

Afioga Maualaivao Pat Ah Him: Faafetai lava. E moni lava sa faateia i le taeao, ae faamalulu atu i le sui usufono mo Faleata Sisifo, e leai, e le o vaivai le mafaufau, o lea lava e maua le malosi. Faafetai.

FOFOGA FETALAI: Tulai mai le sui usufono mamalu e faaauau le saunoaga.

Tofa LEALAILEPULE RIMONI AIAFI: Ia malo faafetai. Ia faamalosi lou mafaufau, faamalosi lau finau ia malo lau finau, aua le vaivai. O le uiga la o lau faamatalaga lau Afioga, po o a vaeveaga e fai, po o a tatou mea e fai, afai lava o lou tofi, afai lava e palota ma fiafia tagata ia te oe, e palota lava ia te oe. E le o faapopoleina la lou sui usufono i le Tulafono Tau Faaofi i vaeveaga ua tuuina mai, a o faaiuga tatou te faia, se o faaiuga e augatupulaga, leaga o faaiuga e malu ai Samoa ma ona tagata palota i le faia o faaiuga talafeagai.

Na saunoa le Afioga i le Tamaitai Minisita i le amataga lava ma faapea mai; ua aveese e i latou nei sei tulou, fai mai o tagata ese le pule ma le aia i totonu o itumalo nei. Lau Afioga i le Tamaitai Minisita, ou te talitonu, e le talafeagai lea saunoaga, e le talafeagai. O le pule....

FOFOGA FETALAI: Ia, o lea na tau maitau atu foi le Nofoa sei tau faauma mai le lafoga, ae ui i lea, tulai maia lau Afioga i le Tamaitai Minisita.

Afioga Hon Fiamē Naomi Mataafa: O le mea e fia faasao faamolemole lau Afioga i le Fofoga Fetalai. E pei e lelei lava le faasao o lea sa tuuavanoa i le mataupu lea. O mau ia, o lea sa aumai i le mafuaaga e tupu ai le faatupulaia o lisi palota a itumalo ia e talanoaina nei. E faaopoopo i le mau lena, fai mai pulega a alii ma faipule, ua omai tagata ese, vaeane lava le mamalu o le atunuu, ua fai e latou le tonu a o lea e nonofo latou. E le o se upu la a le

Minisita, o lea ou te tau atua molimau ua aumai i totonu o le Komisi lea e fau ai le tatou Tulafono Tau Faaofi. Ma lou faaaloalo lava.

FOFOGA FETALAI: Ua e maua mai le faamalamalamaga a le Afioga i le Minisita le sui usufono mo Faleata Sisifo?

Tofa LEALAILEPULE RIMONI AIAFI: Faafetai i lau Afioga. O lea ua saunoa la le Afioga i le Tamaitai Minisita i vaega ia, o molimau. O fea la alii ma faipule ia lau Afioga? O lea ou te iloa le nuu na omai ai. Ae faapefea faipule nei e toalua? Na amanaia le ma tuualalo na ave i ai ma mau na ave i ai? Ua tiai i le lapisi? Na ma o foi maua ma matou tagata ma matou foi mau. O le a la le mea ua apo ai le mau lea e tasi ae faapefea mau e tele? Leaga na matou toe feiloai ma sui sinia, sui matutua o le itumalo lenei o matou, lea e aumai ai fautuaga ma tuualalo ia e avatu.

O le uiga o lau tala, i le taimi o faipule le sui o Vaitele muamua, na o le 18 matai o Vaitele, e malo lava. E le faapea o ni vaevaega po o ni tagata pe a. Se e leai e vaai tagata i le tagata e tulai mai. E matou te le o aveesea le pule ma aiatatau a itumalo, e le o aveesea e tagatanuu o Samoa ni pule ma ni aiatatau mai itumalo, e le o aveesea. A lea e faamautu e ala i sui faipule i totonu o le Palemene lenei o sui mai itumalo nei? Afai la e faaopoopo i ai se isi sui pei ona saunoa lou uso a sui usufono mai Faleata Sasae ma Vaimauga, ave sao i itumalo nei, e le o le mea amitonu lea? Aua e le valea foi tagata la e faafofoga mai, latou te iloa lelei ma silafia, e malu latou i itumalo ma nuu nei. A ou alu atu i uta i Nuu ae ou tautala atu i nai tagata, e faaaloalo mai, aisea? O la e latou te iloa o le tagata Faleata, po o Siusega po o fea lava. Ae a ou sau iinei i Vaimauga ou fai atu i ai, e leai ma se isi e kea mai ia te au, aua foi e le o au o se matai Vaimauga. E faapena. A faapea tatou te o e tulituliloa le aganuu i le vaeluaga o tofi nei ma itumalo, e faapena foi la le mea e tatau ona taatia ai le Tulafono Tau Faaofi lenei.

Lau Afioga i le Fofoga Fetalai, e pei ona avatu se manatu, e i ai vaega lelei ua tuuina mai e le Tulafono Tau Faaofi, ae i ai foi vaega e ao ona toe silasila totoa i ai le Matagaluega ma i tatou uma. E le faapea foi o se faatauagavale i nei sui usufono o lo o tutu mai i le Palota Taitoatasi, e leai, e le o se Tulafono Tau Faaofi na faia e matou. Ae afai ua i ai ni suiga lelei, faavae i luga o mau maumaututu ma mea amiotonu ina ia taoto i lagatonu le faavae o Faiga Palota, e ave i ai le lagolago a lenei Itu. Aua o le amanaia o i latou nei e ala i Faiga Palota, o le mea taua lea. Silasila foi lau Afioga, o Vaimauga ma Faleata, e tu i i le freehold, sosoo ma le customary land. E faapena le tele o mea, sei vagana Vaitele pei ua tele i ai freehold. A o nuu uma o Faleata ma Vaimauga, e tutu faatasi lava le customary ma le freehold. E tu le freehold i totonu o le customary land i faiganuu. E faapefea la ona vaevae nei mea? Afai foi la o le sui faipule e alu atu i i, o le taimi nei, o la e fai uma lava e matou mea, e alu atu lava i itumalo uma e tau i uta i Falelauniu ma nuu uma ia e aumai, e leai se mea o faavasega, e faifaatasi. Ia, a tulai mai la i le mea lea e i ai nei, o le tulaga lena.

Ia, o le tatalo a lenei sui usufono, sei toe tagai lau Afioga i le Palemia ma lau Afioga i le Minisita i lenei Tulafono Tau Faaofi ma atugaluga o sui usufono ua tuuina atu, ina ia ave i ai la outou faimealelei. Ia tatou tagai lelei i ai, po o se mea lea e sagatonu ma taatia ai i le agai i luma Faiga Palota a le tatou Malo. E faamalulu atu foi i le paia o le Fono pe afai e i ai se faamatalaga ua

paopapa i le faafofogaaga a Samoa aemaise le paia o le Maota o Samoa. E faamalulu atu, ae o le taumafai e avatu ni vaivaiga e tusa o lenei Tulafono Tau Faaofi taua tele. Ia manuia le Fono.

FOFOGA FETALAI: Malo. Ia e manatu leaga o lea ua tatou tulata i le tatou taimi malolo, e talitonu foi ona o lo o i ai nisi o fuafuaga a le tatou Maota mo le tatou Semina e pei ona faaiuina i le aso, atoa ai foi ma le tatou sailiga malosi mo le tatou Aso Fono a taeao. O lea ou te talitonu ai ua tataua ona fai se tatou malologa. E momoli atu le agaga faafetai tele i le paia ma le mamalu o le tatou Palemene nei e ala i le tauavameaina o le tatou galuega mai le taeao anaeleila. E talitonu ua faasolo le tatou galuega i nisi o Tulafono Tau Faaofi taua pei ona i ai le Tulafono Tau Faaofi o lo o tagofia nei, faamalo atu le onosai, faamalo foi le fetalai ma le tulaga o le fefaaaliaiga o manatu ma lagona i lenei aso. E talitonu ua taua lea mo le faalogologo atu a le tatou Malo, aemaise o le toe matimatiina o le faatulagaina o lenei Tulafono Tau Faaofi taua aua le agai i luma o le Faiga Palota a le tatou atunuu. E i ai le talitonuga o le a tatou potopoto mai iinei i le aso a taeao, ma o le aso a taeao, o le tatou Aso Fono mulimuli foi lea pei ona faatulagaina i Pepa o Galuega, o le a fetuunai foi e le Fofoga Fetalai tulaga uma e ala i polokalame ua uma ona faataatia i le Pepa o Galuega, atoa ai ma le faaumaina o le tatou galuega lenei. Ua uma foi ona fetuunai ma le Palemia, o se taimi mulimuli ona faatu lea o le lafo sei vagana ua maea uma a tatou galuega faatulagaina mo a taeao, ona tatou malolo ai lea. Ae momoli atu le faafetai tele i lenei aso ma le fuafuaga ma le polokalame ua tatou taunuu i ai, malo le onosai malo foi le faamalolosi.

E faamanatu atu le faaiuina o le tatou Semina nei, e tasi lava le tatou itula, o la e foi e sauni le tatou faamalositino i lenei aso e faaiu ai nai tamalii ia mai Ausetalia mo le Parliamentary Strengthening Programme, ona tatou taumavae ai lea, ona tatou toe potopoto mai lea i le itula e 9 i le taeao a taeao.

E faafetai atu Samoa i lau tapuaiga i lenei vaega o le aso, e talitonu le faamoemoe ua ae i manu le faatamasoaliiga a lau Palemene ona o le tui mai o le mulipapaga ma tapuaia le alofaiva i Fonotaga o lenei aso ma le faamoemoe. Faafetai atu mo le tapuaiga, aemaise ai foi le faamanu ma le faafetai a le aufai tatalo ua pai mai ai faamafanafanaga mo le aso ma le Fonotaga.

E faafetai atu foi i Ofisa Sili o Pulega o Matagaluega ma Pule Sili o Faalapopototoga i tupu ma ee, o tamalii ma failauga, faletua ma tausi, saoa ma tamaitai, le au tusitala o le atunuu. Malo le onosai, e taua la outou galuega fai ma la outou fatuaiga tausi aua le faalauiloaina o le Fonotaga a le tatou Malo, malo faamalolosi mai, tatou taupule ola tatou te feiloai foi iinei i le tatou Fono a taeao.

Ae lei faaiuina le tatou Fonotaga, ou te tatalo atu i le sui usufono mo Gagaemauga Nu.2 lau Fetalai Saleaula e tulai maia sei fai lau tatalo muamua o lenei tausaga.

Na tolopo Taualumaga a le Fono Aoao i le itula e 1:00 i le aoauli.